

四庫全書

經部

欽定四庫全書

經部

論語注疏
目錄
卷一
注解傳述人集解序

詳校官宗人府府丞臣寶光鼎

刑部郎中臣許兆椿覆勘

覆校官中書臣宋枋遠

校對官庶吉士臣徐立綱

謄錄監生臣于希賢

御製讀論語

泰伯章有曰民可使由之既而繼之云乃不可使知當
然所以然朱子分注斯復引程子說明不能使其化人
有不能聖教豈所宜用術非正道詎應出宣尼是義謂
未當而久心蓄疑程朱求弗得蓋強為之辭近從川路
行略得真解茲兩岸迎鑾民數乃無萬伊歡欣近瞻就
摩肩疊跡隨但御舟一過奔避如敗師渙然鳥獸散躡
藉相凌欺前見後來者厥角先紛披殊不曉其故細詢

乃悲兮蓋緣地方吏先以曉諭馳謂御舟之後其舟即
宮闈爾民宜速避定當謹威儀此使知所致不如由彼
為曉百乃漏萬那盡諭蚩蚩堯民順帝則兩忘知識奇
曰當曰所以帝豈有分施宗元郭索傳此義或有窺

御製無倦齋繹論語義

先之更繼以勞之請益曰當無倦為乾象正符不息義

詎惟姑使自深思

末句反程子註語意即胡氏所云勇者喜於有為而不能持久亦未為契

也 旨

--	--	--	--	--	--	--	--

欽定四庫全書

經部八

論語注疏

四書類

目錄

論語注解傳述人
論語集解序

卷一

學而

卷一

爲政

卷三

八佾

卷四

里仁

卷五

公冶長

卷六

雍也

卷七

述而

卷八

泰伯

卷九

子罕

卷十

鄉黨

卷十一

先進

卷十二

顏淵

卷十三

子路

卷十四

憲問

卷十五

衛靈公

卷十六

季氏

卷十七

陽貨

卷十八

微子

卷十九

子張

卷二十

堯曰

臣等謹案論語注疏二十卷魏何晏集解宋邢昺疏昺初擢九經及第咸平二年始置翰林侍講學士以昺為之受詔與杜鎬舒雅等校定羣經義疏蓋唐人止為五經疏而不及

孝經論語至是始成之晏所採孔安國而下
凡若干家皆古訓曷復因皇侃所采諸儒之
說為之疏於章句訓詁名器事物之際詳矣
朱子集註出義理更為精深亦實始基於此
自謂凡見於注疏者不復更詳是也舊刻不
載陸氏釋文今本補入乾隆四十一年五月
恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

論語注解傳述人

唐國子博士兼太子中允贈齊州刺史吳縣開國男陸德明錄
論語者孔子應答弟子及時人所言或弟子相與言
而接聞於夫子之語也當時弟子各有所記夫子既
終微言已絕弟子恐離居已後各生異見而聖言永
滅故相與論撰因輯時賢及古明王之語合成一法
謂之論語鄭康成云仲弓子夏等所撰定漢興傳者

則有三家魯論語者魯人所傳即今所行篇次是也

常山都尉龔奮長信少府夏侯勝丞相韋賢及子玄

成魯扶卿

鄭云扶先或說先先生

太子少傅夏侯建前將軍蕭

望之竝傳之各自名家齊論語者齊人所傳別有問

王知道二篇凡二十二篇其二十篇中章句頗多於

魯論昌邑中尉王吉少府宋畸琅邪王卿御史大夫

貢禹尚書令五鹿充宗膠東庸生竝傳之唯王陽名

家古論語者出自孔氏壁中凡二十一篇有兩子張

如淳云分堯曰篇後子張問何如篇次不與齊魯論

同新論云文異孔安國爲傳後漢馬融亦注之安昌

侯張禹受魯論于夏侯建又從庸生王吉受齊論擇

善而從號曰張侯論最後而行於漢世禹以論授成

帝後漢包咸字子長吳人周氏不詳何人竝爲章句列于學

官鄭玄就魯論張包周之篇章考之齊古爲之注焉

魏吏部尚書何晏集孔安國包咸周氏馬融鄭玄陳

羣

字長文潁川人魏司空

王肅周生烈

燉煌人七錄云字文達本姓唐魏博士侍中

之說并下已意爲集解正始中上之盛行於世今以

爲主鄭玄注十卷王肅注十卷虞翻注十卷何晏集

解十卷譙周注十卷

字允南巴西人晉散騎常侍不拜陽城亭侯

衛瓘注

八卷

少二卷宋明帝補闕

崔豹注十卷

字正熊燕國人晉尚書左中兵郎

李允

集注十卷

東晉人

孫綽集注十卷

字興公太原人東晉廷尉卿長樂亭侯

盈氏注十卷

不詳何人

孟整注十卷

一云孟陋陋字少孤江夏人東晉撫軍參

軍不就

梁覲注十卷

天水人東晉國子博士

袁喬注十卷

字彥叔陳國人

十卷

字長宗吳人東晉司徒左長史

孔澄之注十卷

字仲淵會稽人宋新安太守

虞遐注十卷

會稽人齊員外郎

王弼釋疑三卷樂肇釋疑十

卷徐邈音一卷皇侃撰義疏行於世

欽定四庫全書

論語集解序

魏尚書駙馬都尉關內侯何晏撰

唐陸德明音義 宋邢昺疏

序解音義

此是何晏上集解序今亦隨本音之疏正義曰案漢書藝文

答弟子時人及弟子相與言而接聞於夫子之語也當時弟子各有所記夫子既卒門人相與輯而論纂故謂之論語然則夫子既終微言已絕弟子恐離居已後各生異見而聖言永滅故相與論撰因採時賢及古明王之語合成一法謂之論語也鄭玄云仲弓子游子夏等撰定論者綸也輪也理也次也撰也以

此書可以經綸世務故曰綸也圓轉無窮故曰輪也
蘊含萬理故曰理也篇章有序故曰次也羣賢集定
故曰撰也鄭玄周禮注云答述曰語以此書所載皆
仲尼應答弟子及時人之辭故曰語而在論下者必
經論撰然後載之以示非妄謬也以其口相傳授故
經焚書而獨存也漢興傳者則有三家魯論語者魯
人所傳即今所行篇次是也常山都尉龔奮長信少
府夏侯勝丞相韋賢及子玄成魯扶卿太子少傅夏
侯建前將軍蕭望之竝傳之各自名家齊論者齊人
所傳別有問王知道二篇凡二十二篇其二十篇中
章句頗多於魯論昌邑中尉王吉少府宋畸琅邪王
卿御史大夫貢禹尚書令五鹿充宗膠東庸生竝傳
之唯王吉名家古論語者出自孔氏壁中凡二十一
篇有兩子張篇次不與齊魯論同孔安國爲傳後漢
馬融亦注之安昌侯張禹受魯論于夏侯建又從庸
生王吉受齊論擇善而從號曰張侯論最後而行於

漢世禹以論授成帝後漢包咸周氏竝爲章句列於學官鄭玄就魯論張包周之篇章考之齊古爲之注焉魏吏部尚書何晏集孔安國包咸周氏馬融鄭玄陳羣王肅周生烈之說并下已意爲集解正始中上之盛行於世今以爲主焉序者何晏次序傳授訓說之人及已集解之意序爲論語而作故曰論語序

敘曰漢中壘校尉劉向言魯論語二十篇皆孔子弟子

記諸善言也大子大傅夏侯勝前將軍蕭望之丞相韋

賢及子玄成等傳之音義

壘力軌反校戶教反向舒尚反大子大傅並音泰夏戶雅

反勝音升或升證反相

正義曰此敘魯論之作及傳授之人也敘與序音義同曰

者發語辭也案漢書百官公卿表云中壘校尉掌北軍壘門內外掌西域顏師古曰掌北軍壘門之內而又外

掌西域劉向者高祖少弟楚元王之後辟彊之孫德之子字子政本名更生成帝即位更名向數上疏言得失以向爲中壘校尉向爲人簡易專精思於經術成帝詔校經傳諸子詩賦每一書已向輒條其篇目撮其指意錄而奏之著別錄新序此言魯論語二十篇皆孔子弟子記諸善言也蓋出於彼故何晏引之對文則直言曰言答述曰語散則言語可通故此論夫子之語而謂之善言也表又云太子太傅古官秩二千石傳云夏侯勝字長公東平人少好學爲學精熟善說禮服徵爲博士宣帝立太后省政勝以尚書授太后遷長信少府坐議廟樂事下獄繫再更冬會赦出爲諫大夫上知勝素直復爲長信少府遷太子太傅受詔撰尚書論語說賜黃金百斤年九十卒官賜冢塋葬平陵太后賜錢二百萬爲勝素服五日以報師傳之恩儒者以爲榮始勝每講授常謂諸生曰士病不明經術經術苟明其取青紫如俛拾地芥耳學經不明不如歸耕表又云前後左右將

軍皆周末官秦因之位上卿金印紫綬漢不常置或有前後或有左右皆掌兵及四夷傳云蕭望之字長倩東海蘭陵人也好學齊詩事同縣后倉又從夏侯勝問論語禮服以射策甲科爲郎累遷諫大夫後代丙吉爲御史大夫左遷爲太子太傅及宣帝寢疾選大臣可屬者引至禁中拜望之爲前將軍元帝即位爲弘恭石顯等所害飲鴆自殺天子聞之驚拊手爲之卻食涕泣哀動左右長子伋嗣爲關內侯表又云相國丞相皆秦官金印紫綬掌丞天子助理萬幾應劭曰丞承也相助也秦有左右高帝即位置一丞相十一年更名相國綠綬孝惠高后置左右丞相文帝二年復置一丞相哀帝元壽二年更名大司徒傳曰韋賢字長孺魯國鄒人也賢爲人質朴少欲篤志於學兼通禮尚書以詩教授號稱鄒魯大儒徵爲博士給事中進授昭帝詩稍遷光祿大夫及宣帝即位以先帝師甚見尊重本始三年代蔡義爲丞相封扶陽侯年七十餘爲相五歲地節三年以老病

乞骸骨賜黃金百斤罷歸加賜第一區丞相致仕自賢
始年八十二薨謚曰節侯子玄成字少翁復以明經歷
位至丞相鄒魯諺曰遺子黃金滿籬不如一經玄成爲
相七年建昭三年薨謚曰共侯此四人皆傳魯論語

齊論語二十二篇其二十篇中章句頗多於魯論琅邪

王卿及膠東庸生昌邑中尉王吉皆以教授音義

頗破反

琅音郎本或作瑯邪似嗟反又也

疏正義曰此敎齊論語之興及傳授之

人也齊論語凡二十二篇其二十篇篇名與魯論正同
其篇中章句則頗多於魯論篇者積章而成篇徧也言
出情鋪事明而徧者也積句以成章章者明也總義包
體所以明情者也句必聯字而言句者局也聯字分疆
所以局言者也琅邪膠東郡國名王卿天漢元年由濟
南太守爲御史大夫庸生名譚生蓋古謂有德者也昌

邑中尉者表云諸侯王高帝初置金璽盤綬掌治其國有太傅輔王內史治國民中尉掌武職丞相統衆官景帝中五年改丞相曰相成帝綏和元年省內史更令相治民如郡太守中尉如郡都尉傳云王吉字子陽琅邪卑虞人也少好學明經以郡吏舉孝廉爲郎補若盧右丞遷滎陽令舉賢良爲昌邑中尉此三人皆以齊論語教授於人也故有魯論有齊論疏

正義曰既敘魯論齊論之作及傳述之人乃以此言

結之

魯共王時嘗欲以孔子宅爲宮壞得古文論語音

義

壞音

疏

正義曰此敘得古論之所由也嘗曾也壞毀也言魯共王時曾欲以孔子宅爲宮乃毀之

於壁中故得此古文論語也傳曰魯共王餘景帝子程姬所生以孝景前二年立爲淮陽王前三年徙王魯二十八年薨謚曰共王初好治宮室壞孔子舊宅以廣其官聞鐘磬琴瑟之音遂不敢復壞於其壁中得古文經

傳即謂此論語及孝經爲傳也故漢武帝謂東方朔云
傳曰時然後言人不厭其言又成帝賜翟方進策書云
傳曰高而不危所以長守貴也是漢世通謂論語孝經
爲傳以論語孝經非先王之書是孔子所傳說故謂之
傳所以異於先王之書也言古文者科斗書也所謂倉
頡本體周所用之以今所不識是古人所爲故名古文
形多頭麤尾細狀復團圓似水蟲之科斗故曰科斗也

齊論有問王知道多於魯

論二篇古論亦無此二篇分堯曰下章子張問以爲一

篇有兩子張凡二十一篇篇次不與齊魯論同疏

正義曰此

辨三論篇章之異也齊論有問王知道多於魯論二篇
所謂齊論語二十二篇也古論亦無此問王知道二篇
非但魯論無之古論亦無也古論亦無此二篇而分堯
曰下章子張問以爲一篇有兩子張凡二十一篇如淳

曰分堯曰篇後子張問何如可以從政以下爲篇名曰從政其篇次又不與齊魯論同新論云文異者四百餘字

安昌侯張禹本受魯論兼講齊說善者從之號曰張

侯論爲世所貴包氏周氏章句出焉疏

正義曰此言張禹擇齊魯論之

善者從之爲世所重包周二氏爲章句訓說此張侯論語也傳曰張禹字子文河內軹人也從沛郡施讎受易王陽庸生問論語既皆明習舉爲郡文學久之試爲博士初元中立皇太子令禹授太子論語由是遷光祿大夫數歲出爲東平內史成帝即位徵禹以師賜爵關內侯給事中領尚書事河平四年代王商爲丞相封安昌侯爲相六歲乞骸就第建平二年薨謚曰節侯禹本受魯論於夏侯建又從庸生王吉受齊論故兼講齊說也傳又云始魯扶卿及夏侯勝王陽蕭望之章玄成皆說論語篇第或異禹先事王陽後從庸生采獲所安最後

出而尊貴諸儒爲之語曰欲爲論念張文由是學者多從張氏餘家浸微是其善者從之號曰張侯論爲世所貴之事後漢儒林傳云包咸字子良會稽曲阿人也少爲諸生習魯詩論語舉孝廉除郎中建武中入授皇太子論語又爲其章句拜諫議大夫永平五年遷大鴻臚周氏不詳何人章句者訓解科段之名包氏周氏就張侯論爲之章句訓解以出其義理焉不言名而言氏者蓋爲章句之時義在謙退不欲顯題其名但欲傳之私族故直云氏而已若杜元凱集解春秋謂之杜氏也或曰以何氏諱咸故沒其名但言包氏連言周氏耳

論唯博士孔安國爲之訓解而世不傳至順帝時南郡

太守馬融亦爲之訓說音義

大音泰下大常疏正義曰同守音乎又反此敘訓

說古文論語之人也史記世家安國孔子十一世孫爲武帝博士時魯共王壞孔子舊宅壁中得古文虞夏商

周之書及傳論語孝經悉還孔氏故安國承詔作書傳又作古文孝經傳亦作論語訓解釋詁云訓道也然則道其義釋其理謂之訓解以傳述言之曰傳以釋理言之曰訓解其實一也以武帝末年遭巫蠱事經籍道息故世不傳自此安國之後至後漢順帝時有南郡太守馬融亦爲古文論語訓說案後漢紀孝順皇帝諱保安帝之子也地理志云南郡秦置高帝元年更爲臨江郡五年復故景帝二年復爲臨江郡中二年復故屬荊州表云郡守秦官掌治其郡秩二千石景帝中二年更名太守傳云馬融字季長扶風茂陵人也爲人美辭貌有俊才博通經籍永初中爲校書郎陽嘉二年拜議郎梁商表爲從事中郎轉武都太守三遷爲南郡太守注孝經論語詩易尚書三禮年

漢末大司農鄭玄就魯論篇

章考之齊古爲之註音義

註本又作注之疏正義曰言成反又張注反鄭玄亦爲

論語之注也鄭玄字康成北海高密縣人師事馬融以大司農徵不起居家教授當後漢桓靈時故云漢末注易尚書三禮論語尚書大傳五經緯侯箋毛詩作毛詩譜破許慎五經異義針何休左氏膏肓發公羊墨守起穀梁廢疾可謂大儒作注之時就魯論篇章謂二十篇也復考校之以齊論古論擇其善者而爲之注註與注音義近故司空陳羣大常王肅博士周生烈皆爲義說同

疏正義曰此敘魏時注說論語之人也年世未遠人已歿故是近故也司空古官三公也表云奉常秦官掌宗廟禮儀景帝中六年更名太常博士秦官掌通古今魏志云陳羣字長文潁川許昌人也太祖辟羣爲司空西曹屬文帝即位遷尚書僕射明帝即位進封潁陰侯頃之爲司空青龍四年薨王肅字子邑東海蘭陵人魏衛將軍太常蘭陵景侯甘露元年薨注尚書禮喪服論語孔子家語述毛詩注作聖證論難鄭玄周生烈燉煌

人七錄云字文逸本姓唐魏博士侍中此二人
皆爲論語義說謂作注而說其義故云義說 前世傳

授師說雖有異同不爲訓解中間爲之訓解至于今多

矣所見不同互有得失疏

正義曰將作論語集解故須言先儒有得失不同之說也

據今而道往古謂之前世上教下曰傳下承上曰受謂
張禹以上至夏侯勝以來但師資誦說而已雖說有異
者同者皆不著篇簡以爲傳注訓解中間爲之訓解謂
自古至今中間包氏周氏等爲此論語訓解有二十餘
家故云至于今多矣以其
趣舍各異故得失互有也 今集諸家之善記其姓名有

不安者頗爲改易名曰論語集解音義

頗爲之爲于偽反論如字綸也

輪也理也次也撰也語答述曰語撰次孔子答弟子及
時人之語也鄭玄云仲弓子游子夏等撰解佳買反何

晏集孔安國馬融包氏周氏鄭玄陳羣王肅周生烈義并下已意故謂之集解疏正義曰此敎也今謂何晏時諸家謂孔安國包咸周氏馬融鄭玄陳羣王肅周生烈也集此諸家所說善者而存之示無勦說故各記其姓名注言包曰馬曰之類是也注但記其姓而此連言名者以著其姓所以名其人非謂名字之名也有不安者謂諸家之說於義有不安者也頗爲改易者言諸家之善則存而不改其不善者頗多爲改易之注首不言包曰馬曰及諸家說下言一曰者皆是何氏自下已意改易先儒者也名曰論語集解者何氏注解既畢乃自題之也杜氏注春秋左氏傳謂之集解者謂聚集經傳爲之作解也此乃聚集諸家義理以解論語言同而意異也

光祿大夫關內侯臣孫邕光祿大夫臣鄭沖

散騎常侍中領軍安鄉亭侯臣曹羲侍中臣荀顗尚書

駙馬都尉關內侯臣何晏等上疏

正義曰此敘同集解之人也表云大夫掌

論議有大中大夫中大夫諫大夫皆無員多至數十人
太初元年更名中大夫爲光祿大夫秩比二千石無印
綬爵級十九曰關內侯顏師古曰言有侯號而居京畿
無國邑孫邕字宗儒樂安青州人也晉書鄭冲字文和
榮陽開封人也起自寒微卓爾立操魏文帝爲太子命
爲文學累遷尚書郎出補陳留太守曹爽引爲從事中
郎轉散騎常侍光祿勳表又云侍中散騎中常侍皆加
官應劭曰入侍天子故曰侍中晉灼曰魏文帝合散騎
中常侍爲散騎常侍也又曰所加或列侯將軍卿大夫
將都尉尚書太醫太官令至郎中無員多至數十人如
淳曰將謂都郎將以下也自列侯下至郎中皆得有散
騎及中常侍也又曰侍中中常侍得入禁中散騎並乘
輿車顏師古曰並音步浪反騎而散從無常職也此言
中領軍者表無文安鄉亭侯者不在爵級二十之數蓋

漢末及魏置亭侯列侯之倫也曹義沛國譙人魏宗室
曹爽之弟荀顗字景倩荀爽之子詵之弟也咸熙中爲
司空表又云少府秦官屬官有尚書成帝建始四年初
置尚書員五人駙馬都尉掌駙馬武帝初置秩比二千
石顏師古曰駙副也非正駕車皆爲副馬一曰駙近也
疾也何晏字平叔南陽宛人也何進之孫咸之子曹爽
秉政以晏爲尚書又尚公主著述凡數十
篇正始中此五人共上此論語集解也

論語集解序

欽定四庫全書

論語注疏卷一

魏何晏集解 唐陸德明音義 宋邢昺疏

學而第一音義

以學爲首者明人必須學也凡十六章

疏

正義曰自此至堯曰是魯

論語二十篇之名及第次也當弟子論撰之時以論語爲此書之大名學而以下爲當篇之小目其篇中所載各記舊聞意及則言不爲義例或亦以類相從此篇論君子孝弟仁人忠信道國之法主友之規聞政在乎行德由禮貴於用和無求安飽以好學能自切磋而樂道皆人行之大者故爲諸篇之先既以學爲章首遂以名篇言人必須學也爲政以下諸篇所次先儒不無意焉當篇各言其指此不煩說第順次

也一數之始也言此篇於次當一也

子曰學而時習之不亦說乎注馬曰子者男子之通稱謂孔子也王曰時者學者以時誦習之誦習以時學無廢業所以爲說懌有朋自遠方來不亦樂乎注包曰同門曰朋人不知而不愠不亦君子乎注愠怒也凡人所不知君子不怒音義說音悅注同稱尺證反懌音亦有或作友非朋蒲弘反樂音洛譙周云悅深而樂淺一云自內曰悅疏正義曰此章勸自外曰樂愠紆問反怒也鄭云怨也疏人學爲君子也子者古人稱師曰子子男子之通稱此言子者謂孔子也曰者說文云詞也從口乙聲亦象口氣出也然則曰

者發語詞也以此下是孔子之語故以子曰冠之或言
孔子曰者以記非一人各以意載無義例也白虎通云
學者覺也覺悟所未知也孔子曰學者而能以時誦習
其經業使無廢落不亦說懌乎學業稍成能招朋友有
同門之朋從遠方而來與已講習不亦樂乎既有成德
凡人不知而不怒之不亦君子乎言誠君子也君子之
行非一此其一行耳故云亦也注馬曰子者至說懌○
正義曰云子者男子之通稱者經傳凡敵者相謂皆言
吾子或直言子稱師亦曰子是子者男子有德之通稱
也云謂孔子者嫌爲他師故辨之公羊傳曰子沈子曰
何休云沈子稱子冠氏上者著其爲師也不但言子曰
者辟孔子也其不冠子者他師也然則書傳直言子曰
者皆指孔子以其聖德著聞師範來世不須言其氏人
盡知之故也若其他傳受師說後人稱其先師之言則
以子冠氏上所以明其爲師也子公羊子子沈子之類
是也若非已師而稱他有德者則不以子冠氏上直言

某子若高子孟子之類是也云時者學者以時誦習之者皇氏以爲凡學有三時一身中時學記云發然後禁則扞格而不勝時過然後學則勤苦而難成故內則云十年出就外傳居宿於外學書記十有三年學樂誦詩舞勺十五成童舞象是也二年中時王制云春秋教以禮樂冬夏教以詩書鄭玄云春夏陽也詩樂者聲聲亦陽也秋冬陰也書禮者事事亦陰也互言之者皆以其術相成又文王世子云春誦夏弦秋學禮冬讀書鄭玄云誦謂歌樂也弦謂以絲播詩陽用事則學之以聲陰用事則學之以事因時順氣於功易成也三日中時學記云故君子之於學也藏焉脩焉息焉遊焉是日日所習也言學者以此時誦習所學篇簡之文及禮樂之容日知其所亡月無忘其所能所以爲說懌也譙周云說深而樂淺也一曰在內曰說在外曰樂言亦者凡外境適心則人心說樂可說可樂之事其類非一此學而時習有朋自遠方來亦說樂之事耳故云亦猶易云亦可

醜也亦可喜也注包曰同門曰朋○正義曰鄭玄注大司徒云同師曰朋同志曰友然則同門者同在師門以受學者也朋即羣黨之謂故子夏曰吾離羣而索居鄭玄注云羣謂同門朋友也此言有朋自遠方來者即學記云三年視敬業樂羣也同志謂同其心意所趣鄉也朋疏而友親朋來既樂友即可知故略不言也注愠怒至不怒○正義曰云凡人有所不知君子不怒者其說有二一云古之學者為己已得先王之道含章內映而他人不見不知而我不怒也一云君子易事不求備於一人故為教誨之道若有人鈍根不能知解者君子恕之而不愠怒也

有子曰注孔子弟子有若其為人也孝弟而好犯上者鮮矣注鮮少也上謂凡在已上者言孝弟之人必恭順

好欲犯其上者少也不好犯上而好作亂者未之有也

君子務本本立而道生注本基也基立而後可大成孝

弟也者其爲仁之本與注先能事父兄然後仁道可大

成音義

弟大計反本或作悌下同好呼報反下及注疏

正義曰此章言孝弟之行也弟子有若曰其爲人也孝
於父母順於兄長而好陵犯凡在已上者少矣言孝弟
之人性必恭順故好欲犯其上者少也既不好犯上而
好欲作亂爲悖逆之行者必無故云未之有也是故君
子務脩孝弟以爲道之基本基本既立而後道德生焉
恐人未知其本何謂故又言孝弟也者其爲仁之本與
禮尚謙退不敢質言故云與也注孔子弟子有若○正
義曰史記弟子傳云有若少孔子四十三歲鄭玄曰魯

人注鮮少也。○正義曰釋詁云鮮罕也。故得爲少。皇氏熊氏以爲上謂君親犯謂犯顏諫爭。今案注云上謂凡在已上者則皇氏熊氏違背注意其義恐非也。

子曰巧言令色鮮矣仁。注包曰巧言好其言語令色善

其顏色皆欲令人說之。少能有仁也。音義令力呈反說音悅疏

正義曰此章論仁者必直言正色。其若巧好其言語令善其顏色欲令人說愛之者少能有仁也。

曾子曰注馬曰弟子曾參吾日三省吾身爲人謀而不

忠乎與朋友交而不信乎傳不習乎注言凡所傳之事

得無素不講習而傳之音義參所金反又七南反三息暫反又如字省悉井反視

也鄭云思察己之所行也爲于偽反又如字傳直專反
注同鄭注云魯讀傳爲專今從古案鄭校周之本以齊
古讀正凡五十事鄭本或無此注者然皇疏正義曰此
覽引魯讀六事則無者非也後皆放此疏章論曾子
省身慎行之事弟子曾參嘗曰吾每日三自省察己身
爲人謀事而得無不盡忠心乎與朋友結交而得無不
誠信乎凡所傳授之事得無素不講習而妄傳乎以謀
貴盡忠朋友主信傳惡穿鑿故曾子省慎之注馬曰弟
子曾參○正義曰史記弟子傳云曾參南武城人字子
輿少孔子四十六歲孔子以爲能通孝道故授之業作
孝經死於魯

子曰道千乘之國注馬曰道謂爲之政教司馬法六尺
爲步步百爲畝畝百爲夫夫三爲屋屋三爲井井十爲

通通十爲成成出草車一乘然則千乘之賦其地千成
居地方三百一十六里有畸唯公侯之封乃能容之雖
大國之賦亦不是過焉包曰道治也千乘之國者百里
之國也古者井田方里爲井十井爲乘百里之國適千
乘也融依周禮包依王制孟子義疑故兩存焉敬事而
信注包曰爲國者舉事必敬慎與民必誠信節用而愛
人注包曰節用不奢侈國以民爲本故愛養之使民以
時注包曰作事使民必以其時不妨奪農務音義
道音導本

或作導包云治也注同乘繩證反注同千乘大國之賦也司馬法史記齊景公時有司馬田穰苴善用兵周禮司馬掌征伐六國時齊威王使大夫追論古者兵法附穰苴於其中凡一百五十篇號曰司馬法畸居宜反田之殘也封甫用反又如字包依王制孟子王制疏正義及孟子皆以百里爲大國侈尺紙反又尺氏反疏曰此章論治大國之法也馬融以爲道謂爲之政教千乘之國爲公侯之國方五百里四百里者也言爲政教以治公侯之國者舉事必敬慎與民必誠信省節財用不奢侈而愛養人民以爲國本作事使民必以其時不妨奪農務此其爲政治國之要也包氏以爲道治也千乘之國百里之國也夏即公侯殷周惟上公也餘同注馬曰道至存焉○正義曰以下篇子曰道之以政故云道謂爲之政教史記齊景公時有司馬田穰苴善用兵周禮司馬掌征伐六國時齊威王使大夫追論古者兵法附穰苴於其中凡一百五十篇號曰司馬法此六尺曰步

至成出草車一乘皆彼文也引之者以證千乘之國爲公侯之大國也云然則千乘之賦其地千成者以成出一乘千乘故千成云居地方三百一十六里有畸者以方百里者一爲方十里者百方三百里者三三而九則爲方百里者九合成方十里者九百得九百乘也計千乘猶少百乘方百里者一也又以此方百里者一六分破之每分得廣十六里長百里引而接之則長六百里廣十六里也半折之各長三百里將埤前三百里南西兩邊是方三百一十六里也然西南角猶缺方十六里者一也方十六里者一爲方一里者二百五十六然曷割方百里者爲六分餘方一里者四百今以方一里者二百五十六埤西南角猶餘方一里者一百四十四又復破而埤三百一十六里兩邊則每邊不復得半里故云三百一十六里有畸也云唯公侯之封乃能容之者案周禮大司徒云諸公之地封疆方五百里諸侯之地封疆方四百里諸伯之地封疆方三百里諸子之地封

疆方二百里諸男之地封疆方百里此千乘之國居地方三百一十六里有畸伯子男自方三百而下則莫能容之故云唯公侯之封乃能容之云雖大國之賦亦不是過焉者坊記云制國不過千乘然則地雖廣大以千乘爲限故云雖大國之賦亦不是過焉司馬法兵車一乘甲士三人步卒七十二人計千乘有七萬五千人則是六軍矣周禮大司馬序官凡制軍萬有二千五百人爲軍王六軍大國三軍次國二軍小國一軍魯頌閟官云公車千乘明堂位云封周公於曲阜地方七百里草車千乘及坊記與此文皆與周禮不合者禮天子六軍出自六鄉萬二千五百家爲鄉萬二千五百人爲軍地官小司徒云凡起徒役無過家一人是家出一人鄉爲一軍此則出軍之常也天子六軍既出六鄉則諸侯三軍出自三鄉閟官云公徒三萬者謂鄉之所出非千乘之衆也千乘者自謂計地出兵非彼三軍之車也二者不同故數不相合所以必有二法者聖王治國安不忘

危故令所在皆有出軍之制若從王伯之命則依國之大小出三軍二軍一軍也若其前敵不服用兵未已則盡其境內皆使從軍故復有此計地出軍之法但鄉之出軍是正故家出一人計地所出則非常故成出一車以其非常故優之也云道治也者以治國之法不惟政教而已下文道之以德謂道德故易之但云道治也云千乘之國百里之國也者謂夏之公侯殷周上公之國也云古者井田方里爲井者孟子云方里而井井九百畝是也云十井爲乘百里之國適千乘也者此邑以古之大國不過百里以百里賦千乘故計之每十井爲一乘是方一里者十爲一乘則方一里者百爲十乘開方之法方百里者一爲方十里者百每方十里者一爲方一里者百其賦十乘方十里者百則其賦千乘地與乘數適相當故曰適千乘也云融依周禮包依王制孟子者馬融依周禮大司徒文以爲諸公之地方五百里侯四百里以下也包氏依王制云凡四海之內九州州方

千里州建百里之國三十七十里之國六十五十里之國百有二十凡二百一十國也又孟子云天子之制地方千里公侯之制皆方百里伯七十里子男五十里包氏據此以為大國不過百里不信周禮有方五百里四百里之封也馬氏言名包氏不言名者包氏避其父名也云義疑故兩存焉者以周禮者周公致太平之書為一代大典王制者漢文帝令博士所作孟子者鄒人也名軻師孔子之孫子思治儒術之道著書七篇亦命世亞聖之大才也今馬氏包氏各以為據難以質其是非莫敢去取於義有疑故兩存其說也注包曰作事使至農務○正義曰云作事使民必以其時者謂築都邑城郭也以都邑者人之聚也國家之藩衛百姓之保障不固則敗不修則壞故雖不臨寇必於農隙脩其守禦無妨農務春秋莊二十九年左氏傳曰凡土功龍見而畢務戒事也注云謂今九月周十一月龍星角亢晨見東方三務始畢戒民以土功事火見而致用注云大火心

星次角亢見者致築作之物水昏正而裁注云謂今十月定星昏而中於是樹板幹而興作日至而畢注云日南至微陽始動故土功息若其門戶道橋城郭牆塹有所損壞則特隨壞時修之故僖二十年左傳曰凡啟塞從時是也王荊云用民之力歲不過三日周禮均人職云凡均力政以歲上下豐年則公旬用三日焉中年則公旬用二日焉無年則公旬用一日焉是皆重民之力而不妨奪農務也

子曰弟子入則孝出則弟謹而信汎愛衆而親仁行有

餘力則以學文注馬曰文者古之遺文音義

弟音悌本亦作悌汎

孚劍反行下孟反下章觀其行并注同疏正義曰此章文馬曰文古之遺文也鄭云文道藝也疏明人以德為本學為末男子後生為弟言為人弟與子者入事父兄則當孝與弟也出事公卿則當忠與順也弟順也入不

言弟出不言忠者互文可知也下孔子云出則事公卿入則事父兄孝經云事父孝故忠可移於君事兄弟故順可移於長是也謹而信者理兼出入言恭謹而誠信也汎愛衆者汎者寬博之語君子尊賢而容衆或博愛衆人也而親仁者有仁德者則親而友之能行已上諸事仍有閒暇餘力則可以學先王之遺文若徒學其文而不能行上事則為言非行偽也注言古之遺文者則詩書禮樂易春秋六經是也

子夏曰賢賢易色注孔曰子夏弟子卜商也言以好色

之心好賢則善事父母能竭其力事君能致其身注孔

曰盡忠節不受其身與朋友交言而有信雖曰未學吾

必謂之學矣音義

夏戶雅反好呼報反下章疏正義曰好學同盡津刃反下注同疏此章論

生知美行之事賢。賢易色者，上賢謂好尚之也。下賢謂有德之人，易改也。色，女人也。女有姿色，男子悅之，故經傳之文通謂女人爲色人。多好色不好賢，若能改易好色之心，以好賢則善矣。故曰：賢，賢易色也。事父母，能竭其力者，謂小孝也。言爲子事父，雖未能不匱，但竭盡其力，服其勤勞也。事君能致其身者，言爲臣事君，雖未能將順其美，匡救其惡，但致盡忠節，不愛其身，若童汪錡也。與朋友交，言而有信者，謂與朋友結交，雖不能切磋琢磨，但言約而每有信也。雖曰未學，吾必謂之學矣者，言人生知行此四事，雖曰未嘗從師伏膺，學問然此爲入行之美矣。雖學亦不是過，故吾必謂之學矣。注：孔曰：子夏弟子卜商，正義曰：案史記仲尼弟子傳云：卜商字子夏，衛人也。少孔子四十四歲。孔子既沒，居西河，教授爲魏文侯師。

子曰：君子不重則不威，學則不固。注：孔曰：固，蔽也。一曰

言人不能敦重既無威嚴學又不能堅固識其義理主

忠信無友不如已者過則勿憚改注鄭曰主親也憚難

也音義

憚徒旦反
難乃旦反

正義曰此章勉人爲君子也君子

二孔安國曰固蔽也言君子當須敦重若不敦重則無
威嚴又當學先王之道以致博聞強識則不固蔽也一
曰固謂堅固言人不能敦重既無威嚴學又不能堅固
識其道理也明須敦重也主忠信者主猶親也言凡所
親狎皆須有忠信者也無友不如已者言無得以忠信
不如已者爲友也過則勿憚改者勿無也憚猶難也言
人誰無過過而不改是謂過矣過而能
改善莫大焉故苟有過無得難於改也

曾子曰慎終追遠民德歸厚矣注孔曰慎終者喪盡其

哀追遠者祭盡其敬君能行此二者民化其德皆歸於

厚也疏

正義曰此章言民化君德也慎終者終謂父母之喪也以死者人之終故謂之終執親之喪禮

須謹慎盡其哀也追遠者遠謂親終既葬日月已遠也孝子感時念親追而祭之盡其敬也民德歸厚矣者言君子行此慎終追遠二者民化其德皆歸厚矣言不偷薄也

子禽問於子貢曰夫子至於是邦也必聞其政求之與

抑與之與注鄭曰子禽弟子陳亢也子貢弟子姓端木名賜亢怪孔子所至之邦必與聞其國政求而得之邪抑人君自願與之爲治子貢曰夫子溫良恭儉讓以得

之夫子之求之也其諸異乎人之求之與注鄭曰言夫子行此五德而得之與人求之異明人君自與之音義

貢本亦作韜音同之與音餘下之與同抑於力疏正義反亢音剛又苦浪反必與之與音預治直吏反疏曰此章明夫子由其有德與聞國政之事子禽問於子貢曰夫子至於是邦也必聞其政求之與抑與之與者子禽疑怪孔子所至之邦必與聞其國之政事故問子貢曰此是孔子求於時君而得之與抑人君自願與夫子爲治與抑與皆語辭子貢曰夫子溫良恭儉讓以得之夫子之求之也其諸異乎人之求之與者此子貢答辭也敦柔潤澤謂之溫行不犯物謂之良和從不逆謂之恭去奢從約謂之儉先人後己謂之讓言夫子行此五德而得與聞國政他人則就君求之夫子則修德人君自願與之爲治故曰夫子之求之也其諸異乎人之求之

與諸與皆語辭注鄭曰至之邪○正義曰云子禽弟子陳亢子貢弟子姓端木名賜者家語七十二弟子篇云陳亢陳人字子禽少孔子四十歲史記弟子傳云端木賜字子貢少孔子三十一歲云求而得之邪者邪未定

辭之

子曰父在觀其志父沒觀其行注孔曰父在子不得自專故觀其志而已父沒乃觀其行三年無改於父之道可謂孝矣注孔曰孝子在喪哀慕猶若父存無所改於

父之道

疏正義曰此章論孝子之行父在觀其志者在

沒觀其行者父沒可以自專乃觀其行也三年無改於父之道可謂孝矣者言孝子在喪三年哀慕猶若父存

無所改於父之道可謂爲孝也

有子曰禮之用和爲貴先王之道斯爲美小大由之有

所不行知和而和不以禮節之亦不可行也注馬曰人

知禮貴和而每事從和而不以禮爲節亦不可行疏

正義曰此

章言禮樂爲用相須乃美禮之用和爲貴者和謂樂也樂主和同故謂樂爲和夫禮勝則離謂所居不和也故禮貴用和使不至於離也先王之道斯爲美者斯此也言先王治民之道以此禮貴和美禮節民心樂和民聲樂至則無怨禮至則不爭揖讓而治天下者禮樂之謂也是先王之美道也小大由之有所不行者由用也言每事小大皆用禮而不以樂和之則其政有所不行也知和而和不以禮節之亦不可行也者言人知禮貴和

而每事從和不以禮
爲節亦不可行也

有子曰信近於義言可復也注復猶覆也義不必信信
非義也以其言可反覆故曰近義恭近於禮遠恥辱也
注恭不合禮非禮也以其能遠恥辱故曰近禮也因不
失其親亦可宗也注孔曰因親也言所親不失其親亦

可宗敬音義

近附近之近下及注同又如疏正義曰此字覆芳服反下同遠于萬反章明信與

義恭與禮不同及人行可宗之事信近於義言可復也
者復猶覆也人言不欺爲信於事合宜爲義若爲義事
不必守信而信亦有非義者也言雖非義以其言可反
復不欺故曰近義恭近於禮遠恥辱也者恭惟卑巽禮

貴會時若異在牀下是恭不合禮則非禮也恭雖非禮以其能遠恥辱故曰近禮因不失其親亦可宗也者因親也所親不失其親言義之與比也既能親仁比義不有所失則有知人之鑒故可宗敬也言亦者人之善行可宗敬者非一於其善行可宗之中此爲一行耳故云亦也注義不必信信非義也○正義曰云義不必信者若春秋晉士匄帥師侵齊聞齊侯卒乃還春秋善之是合宜不必守信也云信非義也者史記尾生與女子期於梁下女子不來水至不去抱柱而死是雖守信而非義也

子曰君子食無求飽居無求安注鄭曰學者之志有所不暇敏於事而慎於言就有道而止焉可謂好學也已

注孔曰敏疾也有道有道德者正謂問其是非疏曰正義此

章述好學之事君子食無求飽居無求安者言學者之志樂道忘饑故不暇求其安飽也敏於事而慎於言者敏疾也言當敏疾於所學事業則有成功說命曰遜志務時敏厥修乃來是也學有所得又當慎言說之就有道而正焉者有道謂有道德者正謂問其是非言學業有所未曉當就有道德之人正定其是之與非易文言曰問以辨之是也可謂好學也已者總結之也言能行在上諸事則可謂之爲好學也

子貢曰貧而無諂富而無驕何如子曰可也注孔曰未足多未若貧而樂富而好禮者也注鄭曰樂謂志於道不以貧爲憂苦子貢曰詩云如切如磋如琢如磨其斯之謂與注孔曰能貧而樂道富而好禮者能自切磋琢

磨子曰賜也始可與言詩已矣告諸往而知來者注孔

曰諸之也子貢知引詩以成孔子義善取類故然之往

告之以貧而樂道來答以切磋琢磨音義

諂勅檢反樂音洛好呼報

反注同切治骨曰切磋七多反治象

疏正義曰此章言

曰切磋琢治玉曰琢謂與之與音餘

疏貧之與富皆當

樂道自修也貧而無諂富而無驕何如者之財曰貧佞

說爲諂多財曰富傲逸爲驕言人貧多佞說富多傲逸

若能貧無諂佞富不驕逸子貢以爲善故問夫子曰其

德行何如子曰可也者此夫子答子貢也時子貢富志

怠於學故發此問意謂不驕而爲美德故孔子抑之云

可也言未足多未若貧而樂富而好禮者也者樂謂志

於善道不以貧爲憂苦好禮謂閑習禮容不以富而倦

略此則勝於無諂無驕故云未若言不如也子貢曰詩

云如切如磋如琢如磨其斯之謂與者子貢知師屬己故引詩以成之此衛風淇澳之篇美武公之德也治骨曰切象曰磋玉曰琢石曰磨道其學而成也聽其規諫以自修如玉石之見琢磨子貢言貧而樂道富而好禮其此能切磋琢磨之謂與子曰賜也始可與言詩已矣者子貢知引詩以成孔子義善取類故呼其名而然之告諸往而知來者此言可與言詩之意諸之也謂告之往以貧而樂道富而好禮則知來者切磋琢磨所以可與言詩也

子曰不患人之不己知患不知人也疏

正義曰此章言人當責己而不

責人凡人之情多輕易於知人而患人不知己故孔子抑之云我則不耳不患人之不己知但患己不能知人也

論語注疏卷一

論語注疏卷一考證

道千乘之國注馬曰司馬法六尺爲步步百爲畝畝百爲夫夫三爲屋屋三爲井井十爲通通十爲成成出草車一乘千乘之賦其地千成居地方三百一十六里有畸包曰古者井田方里爲井十井爲乘百里之國適千乘也○

臣宗楷

按注謂馬依周禮包依王制

孟子義疑故兩存焉今以包說計之則八十家出一乘夫一乘甲士三人步卒七十二人牛馬兵甲芻糧

具焉恐非八十家所能給故朱子集注以焉說爲可
據也

論語注疏卷一考證

欽定四庫全書

論語注疏卷二

魏何晏集解 唐陸德明音義 宋邢昺疏

爲政第二音義

先學而後從政故爲政次學而後從政故爲政疏正義曰左

後入政故次前篇也此篇所論孝敬信勇爲政之德也聖賢君子爲政之人也故以爲政冠於章首遂以

名篇

子曰爲政以德譬如北辰居其所而衆星共之注包曰

德者無爲猶北辰之不移而衆星共之音義

共求用反鄭作拱俱

勇反拱手也猶北辰之不移疏正義曰此章言爲政之本或作譬猶北辰之不移要爲政以德者言爲政之善莫若以德德者得也物得以生謂之德淳德不散無爲化清則政善矣譬如北辰居其所而衆星共之者譬況也北極謂之北辰北辰常居其所而不移故衆星共尊之以況人君爲政以德無爲清靜亦衆人共尊之也注包曰至共之○正義曰案爾雅釋文云北極謂之北辰郭璞曰北極天之中以正四時然則極中也辰時也以其居天之中故曰北極以正四時故曰北辰漢書天文志曰中宮太極星其一明者泰一之常居也旁三星三公環之匡衛十二星藩臣皆曰紫宮北斗七星所謂璇璣玉衡以齊七政斗爲帝車運於中央臨制四海分陰陽建四時均五行移節度定諸紀皆繫於斗是衆星共之也

子曰詩三百注孔曰篇之大數一言以蔽之注包曰蔽

猶當也曰思無邪注包曰歸於正音義

蔽必世反包云當也鄭云塞也

當丁浪反又如字邪似嗟反

疏

正義曰此章言爲政之道在於去邪歸正故舉詩要當一句以言之詩三

百者言詩篇之大數也一言以蔽之者蔽猶當也古者謂一句爲一言詩雖有三百篇之多可舉一句當盡其理也曰思無邪者此詩之一言魯頌駉篇文也詩之爲體論功頌德止僻防邪大抵皆歸於正故此一句可以當之也注孔曰篇之大數○正義曰案今毛詩序凡三百一十一篇內六篇亡今其存者有三百五篇今但言三百篇故曰篇之大數

子曰道之以政注孔曰政謂法教齊之以刑注馬曰齊

整之以刑罰民免而無恥注孔曰免苟免道之以德注

包曰德謂道德齊之以禮有恥且格注格正也音義道

導下同德包云道德也鄭云六德謂智疏正義曰此章

仁聖義中和格加百反正也鄭云來也疏言爲政以德

之效也道之以政者政謂法教道謂化誘言化誘於民

以法制教命也齊之以刑者齊謂齊整刑謂刑罰言道

之以政而民不服者則齊整之以刑罰也民免而無恥

者免苟免也言君上化民不以德而以法制刑罰則民

皆巧詐苟免而心無愧恥也道之以德齊之以禮有恥

且格者德謂道德格正也言君上化民必以道德民或

未從化則制禮以齊整使民知有禮則安失禮則恥

如此則民有愧恥而不犯禮且能自修而歸正也

子曰吾十有五而志于學三十而立注有所成也四十

而不惑注孔曰不疑惑五十而知天命注孔曰知天命

之終始六十而耳順注鄭曰耳聞其言而知其微旨七

十而從心所欲不踰矩注馬曰矩法也從心所欲無非

法疏

正義曰此章明夫子隱聖同凡所以勸人也吾十有五而志于學者言成童之歲識慮方明於是乃

志於學也三十而立者有所成立也四十而不惑者志強學廣不疑惑也五十而知天命者命天之所稟受者也孔子四十七學易至五十窮理盡性知天命之終始也六十而耳順者順不逆也耳聞其言則知其微旨而不逆也七十而從心所欲不踰矩者矩法也言雖從心所欲而不踰越法度也孔子輒言此者欲以勉人志學而善始令終也

孟懿子問孝注孔曰魯大夫仲孫何忌懿謚也子曰無

違樊遲御子告之曰孟孫問孝於我我對曰無違注鄭
曰恐孟孫不曉無違之意將問於樊遲故告之樊遲弟
子樊須樊遲曰何謂也子曰生事之以禮死葬之以禮

祭之以禮疏

正義曰此章明孝必以禮孟懿子問孝者
魯大夫仲孫何忌問孝道於孔子也子曰

無違者此夫子答辭也言行孝之道無得違禮也樊遲
御者弟子樊須爲夫子御車也子告之曰孟孫問孝於
我我對曰無違者孟孫即懿子也孔子恐孟孫不曉無
違之意而懿子與樊遲友善必將問於樊遲故夫子告
之樊遲曰何謂也者樊遲亦未達無違之旨故復問曰
何謂也子曰生事之以禮死葬之以禮祭之以禮者此
夫子爲言無違之事也生事之以禮謂冬溫夏清昏定
晨省之屬也死葬之以禮謂爲之棺槨衣衾而舉之卜

其宅兆而安厝之之屬也祭之以禮謂春秋祭祀以時思之陳其簋簠而哀戚之之屬也不違此禮是無違之理也不即告孟孫者初時意在簡略欲使思而得之也必告樊遲者恐孟孫以爲從父之令是無違故既與別後告於樊遲將使復告孟孫也注孔曰至謚也○正義曰春秋定六年經書仲孫何忌如晉傳曰孟懿子往是知孟懿子者即仲孫何忌也謚法曰溫柔賢善曰懿注樊遲至樊須○正義曰案史記弟子傳曰樊須字子遲齊人少孔子三十六歲也

孟武伯問孝子曰父母唯其疾之憂注馬曰武伯懿子

之子仲孫雍武謚也言孝子不妄爲非唯疾病然後使

父母憂音義

義直例反疏正義曰此章言孝子不妄爲妄亡尚反非也武伯懿子之子仲孫雍

也問於夫子爲孝之道夫子答之曰子事父母唯其疾
病然後可使父母憂之疾病之外不得妄爲非法貽憂
於父母也注馬曰至父母憂○正義曰案春秋懿子以
哀十四年卒而武伯嗣哀公十七年左傳曰公會齊侯
於蒙孟武伯相武伯問於高柴曰諸侯盟誰執牛耳季
羔曰鄆行之役吳公子姑曹發陽之役衛石魋武伯曰
然則輓也是武伯爲懿子之子
仲孫輓也謚法剛強直理曰武

子游問孝注孔曰子游弟子姓言名偃子曰今之孝者
是謂能養至於犬馬皆能有養不敬何以別乎注包曰
犬以守禦馬以代勞皆養人者一曰人之所養乃至於
犬馬不敬則無以別孟子曰食而不愛豕畜之愛而不

敬獸畜之音義

養羊尚反下及注養人同別彼列反注同

疏

正義曰此章言爲孝必敬子游

問孝者弟子子游問行孝之道於孔子也子曰今之孝者是謂能養者此下孔子爲子游說須敬之事今之人所謂孝者是唯謂能以飲食供養者也言皆無敬心至於犬馬皆能有養不敬何以別乎者此爲不敬之人作譬也其說有二一曰犬以守禦馬以代勞皆能有以養人者但畜獸無知不能生敬於人若人唯能供養於父母而不敬則何以別於犬馬乎一曰人之所養乃至於犬馬同其飢渴飲之食之皆能有以養之也但人養犬馬資其爲人用耳而不敬此犬馬也人若養其父母而不敬則何以別於犬馬乎言無以別明孝必須敬也注孔曰子游弟子姓名偃○正義曰史記弟子傳曰言偃吳人字子游少孔子四十五歲注包曰至畜之○正義曰云孟子曰者案孟子盡心篇孟子曰食而不愛豕交之也愛而不敬獸畜之也趙岐注云人之交接但食

之而不愛若養豕也愛而不敬若人畜禽獸但愛而不能敬也引之以證孝必須敬彼言豕交之此作豕畜之者所見本異或傳寫誤

子夏問孝子曰色難注包曰色難者謂承順父母顏色乃爲難有事弟子服其勞有酒食先生饌注馬曰先生謂父兄饌飲食也曾是以爲孝乎注馬曰孔子喻子夏服勞先食汝謂此爲孝乎未孝也承順父母顏色乃爲孝也音義食音嗣饌上眷反馬云飲食也鄭作餽音俊食餘曰餽曾音增馬云則也皇侃云嘗也疏正義曰此章言爲孝必須承順父母顏色也子夏問孝者弟子子夏問於孔子爲孝之道也子曰色難者

答之也言承順父母顏色乃爲難也有事弟子服其勞有酒食先生饌曾是以爲孝乎者孔子又喻子夏服勞先食不爲孝也先生謂父兄饌飲食也曾猶則也言若家有勞辱之事或弟或子服其勤勞有酒有食進與父兄飲食汝則謂是以爲孝乎言此未孝也必須承順父母顏色乃爲孝也

子曰吾與回言終日不違如愚注孔曰回弟子姓顏名

回字子淵魯人也不違者無所怪問於孔子之言默而

識之如愚退而省其私亦足以發回也不愚注孔曰察

其退還與二三子說繹道義發明大體知其不愚疏正義

曰此章美顏淵之德子曰吾與回言終日不違如愚者回弟子顏淵也違猶怪問也愚無知之稱孔子言我與

回言終竟一日亦無所怪問於我之言默而識之如無知之愚人也退而省其私亦足以發回也不愚者言回既退還而省察其在私室與二三子說繹道義亦足以發明大體乃知其回也不愚注孔曰至愚○正義曰史記弟子傳云顏回者魯人也字子淵少孔子三十歲年二十九髮盡白蚤死

子曰視其所以注以用也言視其所行用觀其所由注由經也言觀其所經從察其所安人焉廋哉人焉廋哉

注孔曰廋匿也言觀人終始安所匿其情音義馬於廋反下同

廋所留反匿疏正義曰此章言知人之法也視其所以也匿女力反疏者以用也言視其所以行用觀其所由者由經也言觀其所經從察其所安者言察其所安處也人焉廋哉人焉廋哉者廋匿也焉安也言知人之法

但觀察其終始則人安所隱匿其情哉再言之者深明情不可隱也

子曰溫故而知新可以爲師矣注溫尋也尋繹故者又

知新者可以爲人師矣音義

溫鳥門反尋也繹音亦

疏

正義曰此章言爲師

之法溫尋也言舊所學得者溫尋使不忘是溫故也素所未知學使知之是知新也既溫尋故者又知新者則可以爲人師矣注溫尋也○正義曰案中庸云溫故而知新鄭注云溫讀如燐溫之溫謂故學之熟矣後時習之謂之溫案左傳哀十二年公會吳于橐臯太宰嚭請尋盟子貢對曰盟可尋也亦可寒也賈逵注云尋溫也又有司徹云乃鑿尸俎是尋爲溫也言人舊學已精熟在後更習之猶若溫燐故食也

子曰君子不器注包曰器者各周其用至於君子無所

不施疏

正義曰此章明君子之德也器者物象之名形器既成各周其用若舟楫以濟川車輿以行陸

反之則不能君子之德則不如器物各守一用言見幾而作無所不施也

子貢問君子子曰先行其言而後從之注孔曰疾小人

多言而行之不周疏

正義曰此章疾小人多言而行之不周也子貢問於夫子曰君子之

德行何如夫子答之曰君子先行其言而後以言從之言行相副是君子也

子曰君子周而不比注孔曰忠信爲周阿黨爲比小人

比而不周音義

比毗志疏正義曰此章明君子小人德反下同行不同之事忠信爲周阿黨

爲比言君子常行忠信而不私相阿黨小人則反是注忠信爲周○正義曰魯語文也

子曰學而不思則罔注包曰學不尋思其義則罔然無

所得思而不學則殆注不學而思終卒不得徒使人精

神疲殆音義

罔本又作罔殆音待依義當作怠

疏

正義曰此章言敎學法也學而不思則罔

者言爲學之法既從師學則自思其餘蘊若雖從師學而不尋思其義則罔然無所得也思而不學則殆者言但自尋思而不往從師學終卒不得其義則徒使人精神疲勞倦殆

子曰攻乎異端斯害也已注攻治也善道有統故殊塗

而同歸異端不同歸也疏

正義曰此章禁人雜學攻治也異端謂諸子百家之書也

言人若不學正經善道而治乎異端之書斯則爲害之深也以其善道有統故殊塗而同歸異端則不同歸也

注善道至同歸。正義曰云善道有統故殊塗而同歸者。正經是善道也。皆以忠孝仁義爲本。是有統也。四術爲教。是殊塗也。皆以去邪歸正是同歸也。異端之書。則或批糠堯舜戕毀仁義。是不同歸也。殊塗同歸。是易下繫辭文也。

子曰由誨汝知之乎。注孔曰弟子姓仲名由字子路。知

之爲知之不知爲不知。是知也。音義

是知之知如疏正義

曰此章明知也由誨汝知之乎者孔子以子路性剛好以不知爲知故此抑之呼其名曰由我今教誨汝爲知之乎此皆語解知之爲知之不知爲不知是知也者此誨辭也言汝實知之事則爲知之實不知之事則爲不知此是真知也若其知之反隱曰不知及不知妄言我知皆非知也注孔曰至子路。正義曰史記弟子傳云

仲由字子路卞人也少孔子九歲子路性鄙好勇力志
伉直冠雄雞佩玃豚陵暴孔子孔子設禮稍誘子路子
路後儒服委質因
門人請爲弟子

子張學干祿注鄭曰弟子姓顓孫名師字子張干求也

祿祿位也子曰多聞闕疑慎言其餘則寡尤注包曰尤

過也疑則闕之其餘不疑猶慎言之則少過多見闕殆

慎行其餘則寡悔注包曰殆危也所見危者闕而不行

則少悔言寡尤行寡悔祿在其中矣注鄭曰言行如此

雖不得祿亦同得祿之道音義

顓音專尤下求反
行下孟反注同

疏正
義

曰此章言求祿之法子張學干祿者干求也弟子子張師事孔子學求祿位之法子曰多聞闕疑慎言其餘則寡尤者此夫子教子張求祿之法也尤過也寡少也言雖博學多聞疑則闕之尤須慎言其餘不疑者則少過也多見闕殆慎行其餘則寡悔者殆危也言雖廣覽多見所見危者闕而不行尤須慎行其餘不危者則少悔恨也言寡尤行寡悔祿在其中矣者言若少過行又少悔必得祿位設若言行如此雖偶不得祿亦同得祿之道注鄭曰至于張○正義曰史記弟子傳云顓孫師陳人字子張少孔子四十八歲

哀公問曰何爲則民服注包曰哀公魯君謚孔子對曰舉直錯諸枉則民服注包曰錯置也舉正直之人用之廢置邪枉之人則民服其上舉枉錯諸直則民不服音

義

錯七路反注同置也鄭本作疏正義曰此章言治國措投也枉紆枉反邪似嗟反使民服之法哀公問

曰何爲則民服者哀公魯君也問於孔子曰何所云爲則萬民服從也時哀公失德民不服從哀公患之故有此問孔子對曰舉直錯諸枉則民服者此孔子對以民服之法也錯置也舉正直之人用之廢置諸邪枉之人則民服其上也舉枉錯諸直則民不服者舉邪枉之人用之廢置諸正直之人則民不服其上也於時羣邪秉政民心厭棄故以此對之也注包曰哀公魯君諡○正義曰魯世家云哀公名將定公之子周敬王二十六年即位諡法云恭

仁短折曰哀

季康子問使民敬忠以勸如之何注孔曰魯卿季孫肥

康謚子曰臨之以莊則敬注包曰莊嚴也君臨民以嚴

則民敬其上孝慈則忠注包曰君能上孝於親下慈於

民則民忠矣舉善而教不能則勸注包曰舉用善人而

教不能者則民勸勉疏

正義曰此章明使民敬忠勸善之法季康子問使民敬忠以勸

如之何者季康子魯執政之上卿也時以僭濫故民不敬忠勸勉故問於孔子曰欲使民人敬上盡忠勸勉爲善其法如之何子曰臨之以莊則敬者此答之也自上涖下曰臨莊嚴也言君臨民以嚴則民敬其上孝慈則忠者言君能上孝於親下慈於民則民作忠舉善而教不能則勸者言君能舉用善人置之祿位教誨不能之人使之材能如此則民相勸勉爲善也於時魯君蠶食深宮季氏專執國政則如君矣故此答皆以人君之事言之也注魯卿季孫肥康謚○正義曰知者據左傳及世家文也謚法云安樂撫民曰康

或謂孔子曰子奚不爲政注包曰或人以爲居位乃是爲政子曰書云孝乎惟孝友于兄弟施於有政是亦爲政奚其爲爲政注包曰孝乎惟孝美大孝之辭友于兄

弟善於兄弟施行也所行有政道與爲政同疏

正義曰此章言

孝友與爲政同或謂孔子曰子奚不爲政者奚何也或有一人亡其姓名謂孔子曰子既多才多藝何不居官爲政或人以爲居位乃是爲政也子曰書云孝乎惟孝友于兄弟施於有政者此周書君陳篇文引之以答或人爲政之事彼云王若曰君陳惟爾令德孝恭惟孝友于兄弟克施有政孔安國云言其有令德善事父母行己以恭言善事父母者必友于兄弟能施有政今具言與此小異此云孝乎惟孝者美此孝之辭也友于兄弟

者言善於兄弟也施行也行於此二者即有爲政之道也是亦爲政奚其爲爲政者此孔子語也是此也言此孝友亦爲政之道此外何事其爲爲政乎言所行有政道即與爲政同不必居位乃是爲政

子曰人而無信不知其可也注孔曰言人而無信其餘

終無可大車無輓小車無軌其何以行之哉注包曰大

車牛車輓者轅端橫木以縛輓小車駟馬車軌者轅端

上曲鉤衡音義

車音居輓五兮反轅端橫木以縛輓字林五支反輓五忽反又音月轅端上曲

勾疏

正義曰此章明信不可無也人而無信不知其可也者言人而無信其餘雖有他才終無可也大車

無輓小車無軌其何以行之哉者此爲無信之人作譬也大車牛車輓轅端橫木以縛輓駕牛領者也小車駟

馬車軌者轆端上曲鉤衡以駕兩服馬領者也大車無軌則不能駕牛小車無軌則不能駕馬其車何以得行之哉言必不能行也以喻人而無信亦不可行也注包曰至鉤衡○正義曰云大車牛車者冬官考工記車人為車大車崇九尺鄭注云大車平地載任之車較長半柯者也其車駕牛故酒誥曰肇牽車牛遠服賈用故曰大車牛車也說文云輓大車轆端持衡者輓轆前也是輓者轆端橫木以縛輓者也云小車駟馬車者考工記兵車田車乘車也皆駕駟馬故曰駟馬車也說文云軌者車轆端持衡者考工記云國馬之輓深四尺有七寸注云馬高八尺兵車乘車輓崇三尺有三寸加軫與轅七寸又并此輓深則衡高八尺七寸也除馬之高則餘七寸為衡頸之間是輓在衡上也轆從軾以前稍曲而上至衡則居衡之上而嚮下鉤之衡則橫居輓下是轆端上曲鉤衡者名輓也

子張問十世可知也注孔曰文質禮變子曰殷因於夏禮所損益可知也周因於殷禮所損益可知也注馬曰所因謂三綱五常所損益謂文質三統其或繼周者雖百世可知也注物類相召世數相生其變有常故可預知音義

十世可知也一本作可知乎鄭本作可知夏戶雅反餘以意求之三綱謂父子夫婦君臣是也

五常謂仁義禮智信疏正義曰此章明創制革命因沿三統謂天地人三正損益之禮子張問十世可知也者弟子子張問於孔子夫國家文質禮變設若相承至於十世世數既遠可得知其禮乎子曰殷因於夏禮所損益可知也周因於殷禮所損益可知也者此夫子答以可知之事言殷承夏后因用夏禮謂三綱五常不可

變革故因之也所損益者謂文質三統夏尚文殷則損
文而益質夏以十三月爲正爲人統色尚黑殷則損益
之以十二月爲正爲地統色尚白也其事易曉故曰可
知也周因於殷禮所損益可知也者言周代殷立而因
用殷禮及所損益事事亦可知也其或繼周者雖百世
不敢斥言故曰其或言設或有繼周而王者雖多至百
世以其物類相召世數相生其變有常故皆可預知也
注馬曰至三統○正義曰云三綱五常者白虎通云三
綱者何謂謂君臣父子夫婦也君爲臣綱父爲子綱夫
爲妻綱大者爲綱小者爲紀所以張理上下整齊人道
也人皆懷五常之性有親愛之心是以綱紀爲化若羅
網有紀綱之而百目張也所以稱三綱何一陰一陽之
謂道陽得陰而成陰得陽而序剛柔相配故人爲三綱
法天地人君臣法天取象日月屈信歸功也父子法地
取法五行轉相生也夫婦取象人合陰陽有施君羣也

羣下之所歸心臣奉也事君也象屈服之形也父者矩也
以度教子子者孳也孳孳無己也夫者扶也以道扶
接婦者服也以禮屈服也云五常者仁義禮智信也白
虎通云五性者何謂仁義禮智信也仁者不忍好生愛
人義者宜也斷決得中也禮者履也履道成文智者知
也或於事見微知著信者誠也專一不移故人生而應
八卦之體得五氣以為常仁義禮智信是也云損益謂
文質三統者白虎通云王者必一質一文者何所以承
天地順陰陽陽道極則陰道受陰道極則陽道受明一
陽二陰不能繼也質法天文法地而已故天為質地受
而化之養而成之故為文尚書大傳曰王者一質一文
據天地之道禮三正記曰質法天文法地帝王始起先
質後文者順天地之道本末之義先後之序也事莫不
先其質性乃後有其文章也夏尚黑殷尚白周尚赤此
之謂三統故書傳略說云天有三統物有三變故正色
有三天有三生三死故土有三王王特一生死又春秋

緯元命包及樂緯稽耀嘉云夏以十三月爲正息卦受泰注云物之始其色尚黑以寅爲朔殷以十二月爲正息卦受臨注云物之牙其色尚白以難鳴爲朔周以十一月爲正息卦受復其色尚赤以夜半爲朔又三正記云正朔三而改文質再而復以此推之自夏以上皆正朔三而改也鄭注尚書三帛高陽氏之後用赤繒高辛氏之後用黑繒其餘諸侯用白繒如鄭此意卻而推之舜以十一月爲正尚赤堯以十二月爲正尚白故曰其餘諸侯用白繒高辛氏以十三月爲正尚黑故云高辛氏之後用黑繒高陽氏以十一月爲正尚赤故云高陽氏之後用赤繒少皞以十二月爲正尚白黃帝以十三月爲正尚黑神農以十一月爲正尚赤赤女媧以十二月爲正尚白伏羲以上未有間焉易說卦云帝出乎震則伏羲也建寅之月又木之始其三正當從伏羲以下文質再而復者文質法天地文法地質法天周文法地而爲天正殷質法天而爲地正者正朔文質不相須正朔

以三而改文質以二而復各自為義不相須也建子之月為正者謂之天統以天之陽氣始生為百物得陽氣微稍動變故為天統建丑之月為正者以其物已吐芽不為天氣始動物又未出不得為人所施功唯在地中含養萌芽故為地統建寅之月為正者以其物出於地人功當須脩理故謂之人統統者本也謂天地人之本也然王者必以此三月為正者以其此月物生微細又是歲之始生王者繼天理物含養微細又取其歲初為正朔之始既天地人三者所繼不同故各改正朔不相襲也所尚既異符命亦隨所尚而來故禮緯稽命徵云其天命以黑故夏有玄圭天命以赤故周有赤雀銜書天命以白故殷有白狼銜鉤是天之所命亦各隨人所尚符命雖逐所尚不必皆然故天命禹觀河見白面長人洛子命云湯觀於洛沈璧而黑龜與之書黃魚雙躍泰誓言武王伐紂而白魚入於王舟是符命不皆逐正色也鄭康成之義自古以來皆改正朔若孔安國則

改正朔殷周二代故注尚書湯承堯舜禪代之後革命
創制改正易服是從湯始改正朔也注物類至相生○
正義曰云物類相召者謂三綱五常各以類相召因而
不變也云世數相生者謂文質三統及五行相次周而
復始而其世運有數相生變革也

子曰非其鬼而祭之諂也注鄭曰人神曰鬼非其祖考
而祭之者是諂求福見義不爲無勇也注孔曰義所宜

爲而不能爲是無勇義

諂勅檢反

疏正義曰此章言祭必已親勇必爲義也非

其鬼而祭之諂也者人神曰鬼言若非已祖考而輒祭
他鬼者是諂媚求福也見義不爲無勇也者義宜也言
義所宜爲而不能爲者是無勇之人也注鄭曰至求福
○正義曰云人神曰鬼者周禮大宗伯之職掌建邦之

天神人鬼地示之禮是人神曰鬼也左傳曰神不歆非類民不祀非族故非其祖考而祭之者是諂求福也注孔曰至無勇○正義曰若齊之田氏弑君夫子請討之是義所宜為也而魯君不能為討是無勇也

論語注疏卷二

論語注疏卷二考證

爲政章譬如北辰疏北辰謂之北辰。陸埏經世驪珠曰類考云先儒皆以天體無星處謂之辰今考星書稱辰不一北極固名北辰而大火亦謂之大辰五行中之水星又謂之辰星十二支謂之十二辰日月星又謂之三辰五行之時亦謂之五辰原其義蓋起于辰位乃星躔之首歲紀之始水星近輔乎日爲行星之長大火天帝之座爲舍星之長長者皆稱辰焉日

月之會謂之辰一歲日月十二會日月所會始于東方蒼龍角亢之星角亢始于辰故以所始者言之日月星至辰而畢見故稱三辰素問五運起于角軫角軫辰分也故五行之時亦謂五辰然則北辰居所亦謂統星之長耳此說最爲明曉只將下衆星句對看便見辰字本位且本文但言居所原祇形其象之尊也自連入北極添出動與不動摹擬遂多反忘卻北辰之辰字正義矣

論語注疏卷二考證

欽定四庫全書

論語注疏卷三

魏何晏集解 唐陸德明音義 宋邢昺疏

八佾第三音義

凡二十章

疏

正義曰前篇論為政為政之善莫善禮樂禮以安上

治民樂以移風易俗得之則安失之則危故此篇論禮樂得失也

孔子謂季氏八佾舞於庭是可忍也孰不可忍也注馬

曰孰誰也佾列也天子八佾諸侯六卿大夫四士二八

人為列八八六十四人魯以周公故受王者禮樂有八

佾之舞季桓子僭於其家廟舞之故孔子譏之音義佾

逸列也注同疏正義曰此章論魯卿季氏僭用禮樂之

僭子念反疏事孔子謂季氏八佾舞於庭者謂者評

論之稱季氏魯卿於時當桓子也佾列也舞者八人為

列八八六十四人桓子用此八佾舞於家廟之庭故孔

子評論而譏之是可忍也孰不可忍也者此孔子所譏

之語也孰誰也人之僭禮皆當罪責不可容忍季氏以

陪臣而僭天子最難容忍故曰若是可容忍他人更誰

不可忍也注馬曰至譏之○正義曰孰誰釋詁文佾列

書傳通訓也云天子八佾諸侯六大夫四士二者隱五

年左傳文也云八人為列八八六十四人者杜預何休

說如此其諸侯用六者六六三十六人大夫四四四十

六人士二二二四人服虔以用六為六八四十八人大

夫四為四八三十二人士二為二八十六人今以舞勢

宜方行列既減即每行人數亦宜減故同何杜之說天

子所以八佾者案隱五年左傳考仲子之宮將萬馬公問羽數於衆仲對曰天子用八諸侯用六大夫四士二夫舞所以節八音而行八風故自八以下杜預云唯天子得盡物數故以八為列諸侯則不敢用八所謂八音者金石土革絲木匏竹也鄭玄云金鐘鎛也石磬也土塤也革鼓鼗也絲琴瑟也木柷敔也匏笙也竹管簫也所謂八風者服虔以為八卦之風乾音石其風不周坎音草其風廣莫艮音匏其風融震音竹其風明庶巽音木其風清明離音絲其風景坤音土其風涼兌音金其風闐闐又易緯通卦驗云立春調風至春分明庶風至立夏清明風至夏至景風至立秋涼風至秋分闐闐風至立冬不周風至冬至廣莫風至是則天子之舞所以節八音而行八風故八佾也云魯以周公之故受王者禮樂有八佾之舞者此釋季氏所以得僭之由由魯得用之也案禮記祭統云昔者周公旦有勲勞於天下成王康王賜之以重祭朱干玉戚以舞大武八佾以舞大

夏此天子之樂也重周公故以賜魯又明堂位曰命魯公世世祀周公以天子之禮樂是受王者禮樂也然王者禮樂唯得於文王周公廟用之若用之他廟亦為僭也故昭二十五年公羊傳稱昭公謂子家駒曰吾何僭哉答曰朱干玉戚以舞大夏八佾以舞大武此皆天子之禮也是昭公之時僭用他廟也云季桓子僭於家廟舞之故孔子譏之者案經但云季氏知是桓子者以孔子與桓子同時親見其事而譏之故知桓子也何休云僭齊也下效上之辭季氏陪臣也而效君於上故云僭也大夫稱家祭法大夫三廟此經又言於庭魯之用樂見於經傳者皆據廟中祭祀時知此亦僭於其家廟舞之故孔子譏之也

三家者以雍徹注馬曰三家謂仲孫叔孫季孫雍周頌

臣工篇名天子祭於宗廟歌之以徹祭今三家亦作此

樂子曰相維辟公天子穆穆奚取於三家之堂注包曰

辟公謂諸侯及二王之後穆穆天子之容貌雍篇歌此

者有諸侯及二王之後來助祭故也今三家但家臣而

已何取此義而作之於堂邪音義

雍於容反相息亮反助也辟必亦反君也

注疏正義曰此章譏三家之僭也三家者以雍徹者此

同疏弟子之言將論夫子所譏之語故先設此文以為

首引三家謂仲孫叔孫季孫雍周頌臣工篇名天子祭

於宗廟歌之以徹祭今三家亦作此樂以徹祭故夫子

譏之子曰相維辟公天子穆穆奚取於三家之堂者此

夫子所譏之語也先引詩文後言其不可取之理也相

維辟公天子穆穆者此雍詩之文也相助也維辭也辟

公謂諸侯及二王之後穆穆天子之容貌雍篇歌此者

欽定四庫全書

論語注疏

三

有諸侯及二王之後來助祭故也今三家但家臣而已
何取此義而作之於堂乎注馬曰至此樂○正義曰三
孫同是魯桓公之後桓公適于莊公為君庶子公子慶
父公子叔牙公子季友仲孫是慶父之後叔孫是叔牙
之後季孫是季友之後其後子孫皆以其仲叔季為氏
故有此氏並是桓公子孫故俱稱孫也至仲孫氏後世
改仲曰孟孟者庶長之稱也言已是庶不敢與莊公為
伯仲叔季之次故取庶長為始也云雍周頌臣工篇名
者即周頌臣工之什第七篇也云天子祭於宗廟歌之
以徹祭者案周禮樂師云及徹帥學士而歌徹鄭玄云
徹者歌雍又小師云徹歌鄭云於有司徹而歌雍是知
天子祭於宗廟歌之以徹祭也今三家亦作此樂故夫
子譏之也注包曰至堂邪○正義曰云辟公謂諸侯及
二王之後者此與毛傳同鄭玄以辟為卿士公謂諸侯
為異餘亦同也云穆穆天子之容貌者曲禮云天子穆
穆爾雅釋詁云穆穆美也是天子之容貌穆穆然美也

云雍篇歌此者有諸侯及二王之後助祭則不可歌也云今三家但言無諸侯及二王之後助祭則不可歌也云今三家但家臣而已何取此義而作之於堂邪者卿大夫稱家臣謂家相邑宰之屬來助祭耳何取此雍詩之義而秦作於堂邪邪語辭魯用天子禮樂以雍徹由是三家僭之也

子曰人而不仁如禮何人而不仁如樂何注包曰言人

而不仁必不能行禮樂疏

正義曰此章言禮樂資仁而行也人而不仁如禮何人而

不仁如樂何者如秦也言人而不仁秦此禮樂何謂必不能行禮樂也

林放問禮之本注鄭曰林放魯人子曰大哉問禮與其

奢也寧儉喪與其易也寧戚注包曰易和易也言禮之

本意失於奢不如儉喪失於和易不如哀戚音義易反

包云和易注同鄭疏正義曰此章明禮之本意也林放

云簡戚千歷反問禮之本者林放魯人也問於夫子

子禮之本意如何子曰大哉問者夫子將答禮本先嘆

美之也禮之末節人尚不知林放能問其本其意非小

故曰大哉問也禮與其奢也寧儉喪與其易也寧戚者

此夫子所答禮本也奢汰侈也儉約省也易和易也戚

哀戚也與猶等也奢與儉易與戚等俱不合禮但禮不

欲失於奢寧失於儉喪不欲失於易寧失於戚言禮之

本意禮失於奢不如儉喪失於和易不如哀戚

子曰夷狄之有君不如諸夏之亡也注包曰諸夏中國

亡無也疏正義曰此章言中國禮義之盛而夷狄無也

舉夷狄則戎蠻可知諸夏中國也亡無也言

夷狄雖有君長而無禮義中國雖偶無君若周召共和之年而禮義不廢故曰夷狄之有君不如諸夏之亡也
注包曰諸夏中國○正義曰此及閔元年左氏傳皆言諸夏襄四年左傳魏絳云諸夷必叛華夏皆謂中國而謂之華夏者夏大也言有禮儀之大有文章之華也

季氏旅於泰山子謂冉有曰女弗能救與注馬曰旅祭名也禮諸侯祭山川在其封內者今陪臣祭泰山非禮也冉有弟子冉求時仕於季氏救猶止也對曰不能子曰嗚呼曾謂泰山不如林放乎注包曰神不享非禮林放尚知問禮泰山之神反不如林放邪欲誣而祭之音

義

本或作鳥乎音同會則登反則也享許丈反疏曰此

義

旅

音呂

馬云

祭名

按祭山曰

旅

與音餘

鳴呼

疏

曰正

義

本

或作鳥

乎音同

會則登

反則也

享許丈

反疏曰

此

義

章譏季氏非禮祭泰山也季氏旅於泰山者旅祭名也
禮諸侯祭山川在其封內者今陪臣祭泰山非禮也子
謂冉有曰女弗能救與者冉有弟子冉求時仕於季氏
救猶止也夫子見季氏非禮而祭泰山故以言謂弟子
冉有曰女既臣於季氏知其非禮即合諫止女豈不能
諫止與與語辭對曰不能者言季氏僭濫已不能諫止
也子曰嗚呼曾謂泰山不如林放乎孔子嘆其失禮
故曰嗚呼曾之言則也夫神不享非禮林放尚知問禮
況泰山之神豈反不如林放乎而季氏欲誣罔而祭之
也言泰山之神必不享季氏之祭若其享之則是不如
林放也注馬曰至止也○正義曰云旅祭名者周禮大
宗伯職云國有大故則旅上帝及四望鄭注云故謂凶
裁旅陳也陳其祭事以祈焉禮不如祀之備也故知旅
祭名也云禮諸侯祭山川在其封內者王制云諸侯祭

名山大川之在其地者是也云今陪臣祭泰山非禮也者陪重也諸侯既為天子之臣故謂諸侯之臣為陪臣泰山在魯封內故魯得祭之今季氏亦祭故云非禮云冉有弟子冉求者史記弟子傳云冉求字子有少孔子二十九歲鄭玄曰魯人

子曰君子無所爭必也射乎注孔曰言於射而後有爭

揖讓而升下而飲注王曰射於堂升及下皆揖讓而相

飲其爭也君子注馬曰多算飲少算君子之所爭音義

爭責衡反爭闕之爭絕句必也射乎鄭疏正義曰此章讀以必也絕句飲王於鵠反又如字疏言射禮有君

子之風也君子無所爭者言君子之人謙卑自牧無所競爭也必也射乎者君子雖於他事無爭其或有爭必

也於射禮乎言於射而後有爭也揖讓而升下而飲者
禮射於堂將射升堂及射畢而下勝飲不勝其耦皆以
禮相揖讓也其爭也君子者射者爭中正鵠而已不同
小人厲色援臂故曰其爭也君子注孔曰至有爭○正
義曰鄭注射義云飲射爵者亦揖讓而升降勝者袒決
遂執張弓不勝者襲說決拾卻左手右加弛弓於其上
而升飲君子恥之是以射則爭中是於射而後有爭注
王曰至相飲○正義曰云射於堂升及下皆揖讓而相
飲者儀禮大射云耦進上射在左並行當階北面揖及
階揖升堂揖皆當其物北面揖及物揖射畢北面揖揖
如升射是射時升降揖讓也大射又云飲射爵之時勝
者皆袒決遂執張弓不勝者皆襲說決拾卻左手右加
弛弓于其上遂以執弣揖如始升射及階勝者先升升
堂少右不勝者進北面坐取豐上之觶立卒觶坐奠於
豐下興揖不勝者先降是飲射爵之時揖讓升降也注
馬曰至所爭○正義曰云多算飲少算者算等也鄉射

禮曰箭筈八十長尺有握握素是也多算謂勝者少算謂不勝者勝飲不勝而相揖讓故曰君子之所爭也

子夏問曰巧笑倩兮美目盼兮素以爲絢兮何謂也注馬曰倩笑貌盼動目貌絢文貌此上二句在衛風碩人之二章其下一句逸也子曰繪事後素注鄭曰繪畫文也凡繪畫先布衆色然後以素分布其間以成其文喻美女雖有倩盼美質亦須禮以成之曰禮後乎注孔曰孔子言繪事後素子夏聞而解知以素喻禮故曰禮後乎子曰起予者商也始可與言詩已矣注包曰予我也

孔子言子夏能發明我意可與共言詩音義

倩七練反盼普覓反

動目貌字林云美目也又匹簡反又匹覓反絢呼縣反
馬云文貌鄭云文成章曰絢繪胡對反本又作績同畫
文也喻如字又疏正義曰此章言成人須禮也子夏問
夷住反解音蟹曰巧笑倩兮美目盼兮素以為絢兮
何謂也者倩笑貌盼動目貌絢文貌此衛風碩人之篇
閔莊姜美而不見答之詩也言莊姜既有巧笑美目倩
盼之容又能以禮成文絢然素喻禮也子夏讀詩至此
三句不達其旨故問夫子何謂也子曰繪事後素者孔
子舉喻以答子夏也繪畫文也凡繪畫先布衆色然後
以素分布其間以成其文喻美女雖有倩盼美質亦須
禮以成之也曰禮後乎者此子夏語子夏問孔子言繪
事後素即解其旨知以素喻禮故曰禮後乎子曰起予
者商也始可與言詩已矣者起發也予我也商子夏名
孔子言能發明我意者是子夏也始可與共言詩也注

馬曰至逸也○正義曰云此上二句在衛風碩人之二章者案今毛詩碩人四章章七句其二章曰手如柔荑膚如凝脂領如蝤蛸齒如瓠犀螭首蛾眉巧笑倩兮美目盼兮是也云其下一句逸者今毛詩無此一句故曰逸言亡逸也注鄭曰至其文○正義曰案考工記云畫績之事雜五色下云畫績之事後素功是知凡繪畫先布衆色然後以素分布其間以成其文章也

子曰夏禮吾能言之杞不足徵也殷禮吾能言之宋不足徵也注包曰徵成也杞宋二國名夏殷之後夏殷之禮吾能說之杞宋之君不足以成也文獻不足故也足則吾能徵之矣注鄭曰獻猶賢也我不以禮成之者以

此二國之君文章賢才不足故也疏

正義曰此章言夏商之後不能行先

王之禮也夏禮吾能言之杞不足徵也殷禮吾能言之宋不足徵也者徵成也杞宋二國名夏殷之後也孔子

言夏殷之禮吾能說之但以杞宋之君闇弱不足以成之也文獻不足故也足則吾能徵之矣者此又言不足

徵之意獻賢也孔子言我不以禮成之者以此二國之君文章賢才不足故也注包曰至成也○正義曰徵成

釋詁文云杞宋二國名夏殷之後者樂記云武王克殷下車而封夏后氏之後於杞封殷之後於宋是也

子曰禘自既灌而往者吾不欲觀之矣注孔曰禘祫之

禮為序昭穆故毀廟之主及羣廟之主皆合食於太祖

灌者酌鬱鬯灌於太祖以降神也既灌之後列尊卑序

昭穆而魯逆祀躋僖公亂昭穆故不欲觀之矣音義大禘

計反又祭也灌古亂反注同禘戶夾反為于偽反昭常

遙反說文作佻下同大音泰下同也勃亮反僖子兮反

疏正義曰此章言魯禘祭非禮之事禘者五年大祭之

名灌者將祭酌鬱鬯於大祖以降神也既灌之後列

尊卑序昭穆而魯逆祀躋僖公亂昭穆故孔子曰禘祭

自既灌以往吾則不欲觀之也注孔曰至觀之○正義

曰云禘祫之禮為序昭穆故毀廟之主及羣廟之主皆

合食於大祖者鄭玄曰魯禮三年喪畢而祫於大祖明

年春禘於羣廟自爾之後五年而再殷祭以遠主初始

入祧新死之主又當與先君相接故禮因是而為大祭

九

以審序昭穆故謂之禘禘者諦也言使昭穆之次審諦

而不亂也祫者合也文二年公羊傳曰大祫者何合祭

也

其合祭奈何毀廟之主陳於大祖未毀廟之主皆升

合食於大祖是也云灌者酌鬱鬯灌於大祖以降神者

論語注疏

郊特牲云周人尚臭灌用鬯臭鬱合鬯臭陰達於淵泉灌以圭璋用玉氣也既灌然後迎牲致陰氣也鄭注云灌謂以圭瓚酌鬯始獻神也鬱鬱金草釀秬為酒煮鬱金草和之其氣芬芳調暢故曰鬱鬯言未殺牲先酌鬱鬯酒灌地以求神於大祖廟也云既灌之後列尊卑序昭穆者言既灌地降神之後始立木主以尊卑陳列大祖前大祖東鄉昭南鄉穆北鄉其餘孫從王父父曰昭子曰穆昭取其鄉明穆取其北面尚敬三年一祫五年一禘禘所以異於祫者毀廟之主陳於大祖與祫同未毀廟之主則各就其廟而祭也云而魯逆祀躋僖公亂昭穆故不欲觀之者春秋文二年秋八月丁卯大事于大廟躋僖公公羊傳曰躋者何升也何言乎升僖公譏何譏爾逆祀也何休云升謂西上禮昭穆指父子近取法春秋惠公與莊公當同南面西上隱桓與閔僖亦當同北面西上繼閔者在下文公緣僖公於閔公為庶兄置僖公於閔公上失先後之義故譏之是知當閔在僖

上今升僖先閔故云逆祀二公位次之逆非昭穆亂也
此注云亂昭穆及魯語云將躋僖公宗有司曰非昭穆
也弗忌曰我為宗伯明者為昭其次為穆何常之有如
彼所言又似閔僖異昭穆者位次之逆如昭穆之亂假
昭穆以言之非謂異昭穆也若兄弟相代即異昭穆設
今兄弟四人皆立為君則祖父之廟即已從毀知其理
必不然故先儒無作此說以此
逆祀失禮故孔子不欲觀之也

或問禘之說子曰不知也注孔曰答以不知者為魯諱
知其說者之於天下也其如示諸斯乎指其掌注包曰

孔子謂或人言知禘禮之說者於天下之事如指示掌

中之物言其易了音義

鼓反以疏

正義曰此章言諱國惡
之禮也或問禘之說者

或人問孔子禘祭之禮其說如何子曰不知也者孔子
答言不知禘禮之說答以不知者為魯諱諱國惡禮也
若其說之當云禘之禮序昭穆時魯躋僖公亂昭穆說
之則彰國之惡故但言不知也知其說者之於天下也
其如示諸斯乎也者諸於也斯此也孔子既答或人
不知禘禮之說若不更說恐或人以為已實不知無
明其諱國惡且恐後世以為禘祭之禮聖人不知而致
廢絕更為或人言此也言知禘禮之說者於天下之事
其如指示於此掌中之物言其易了也指其掌者此句
弟子作論語時言也當時孔子舉一手伸掌以一手指
之以示或人曰其如示諸斯乎弟子等恐人不知示諸
斯謂指示何等物故著此一句言是時夫子指其掌也
祭如在注孔曰言事死如事生祭神如神在注孔曰謂
祭百神子曰吾不與祭如不祭注包曰孔子或出或病

而不自親祭使攝者為之不致肅敬於心與不祭同音

義

不與之疏正義曰此章言孔子重祭禮祭如在者謂與音預祭宗廟必致其敬如其親存言事死如事

生也祭神如神在者謂祭百神亦如神之存在而致敬也子曰吾不與祭如不祭者孔子言我若親行祭事則必致其恭敬我或出或病而不自親祭使人攝代己為之不致肅敬於心與不祭同注謂祭百神○正義曰百神謂宗廟之外皆是言百神舉成數

王孫賈問曰與其媚於奧寧媚於竈何謂也注孔曰王

孫賈衛大夫與內也以喻近臣竈以喻執政賈執政者

欲使孔子求昵之微以世俗之言感動之也子曰不然

獲罪於天無所禱也注孔曰天以喻君孔子拒之曰如

獲罪於天無所禱於衆神音義

媚美記反與烏報反孔云內也鄭云西南隅昵

女乙反亦作暱禱丁

疏

正義曰此章言夫子守禮不求媚於人也王孫賈者衛執政大

夫也問曰與其媚於奧寧媚於竈何謂也者媚趣嚮也與內也謂室內西南隅也以其隱奧故尊者居之其處雖尊而閒靜無事以喻近臣雖尊不執政柄無益於人也竈者飲食之所由雖處卑褻為家之急用以喻國之執政位雖卑下而執賞罰之柄有益於人也此二句世俗之言也言與其趣於閒靜之奧寧若趣於急用之竈以喻其求於無事之近臣寧若求於用權之執政王孫賈時執政國政舉此二句佯若不達其理問於孔子曰何謂也欲使孔子求媚親昵於己故微以世俗之言感動之也子曰不然獲罪於天無所禱也者孔子拒賈之辭

也然如此也言我則不如世俗之言也天以喻君獲猶得也我道之行否由於時君無求於衆臣如得罪於天無所禱於衆神

子曰周監於二代郁郁乎文哉吾從周注孔曰監視也

言周文章備於二代當從之音義監古暫反觀也疏正義

曰此章言周之禮文尤備也周監於二代郁郁乎文哉者監視也二代謂夏商郁郁文章貌言以今周代之禮法文章迴視夏商二代則周代郁郁乎有文章哉吾從周者言周之文章備於二代故從而行之也

子入大廟注包曰大廟周公廟孔子仕魯魯祭周公而

助祭也每事問或曰孰謂鄉人之子知禮乎入大廟每

事問注孔曰鄉孔子父叔梁紇所治邑時人多言孔子知禮或人以為知禮者不當復問子聞之曰是禮也注

孔曰雖知之當復問慎之至也音義

大音泰注及下同鄉側留反邑名紇

恨沒反又恨發

疏正義曰此章言夫子慎禮也子入大

反復扶又反

廟者子謂孔子大廟周公廟孔子仕

魯魯祭周公而助祭故得入之也每事問者言大廟之

中禮器之屬每事輒問於令長也或曰孰謂鄉人之子

知禮乎入大廟每事問者孰誰也鄉人魯鄉邑大夫孔

子父叔梁紇也或有人曰誰謂鄉大夫之子知禮者也

時人多言孔子知禮或人以為知禮者不當復問何為

入大廟而每事問乎意以為孔子不知禮子聞之曰是

禮也者孔子聞或人之譏乃言其問之意以宗廟之禮

當須重慎不可輕言雖已知之當更復問慎之至也注

包曰至助祭也○正義曰云大廟周公廟者文十三年公羊傳曰周公稱大廟魯公稱世室羣公稱宮故知大廟周公廟也云孔子仕魯者史記孔子世家云孔子貧且賤及長嘗為季氏吏而料量平嘗為司職吏而畜蕃息由是為司空其後定公以孔子為中都宰一年四方皆則之由中都宰為司空由司空為大司寇攝相事是仕魯由是故得與助祭也注孔曰至治邑○正義曰云鄭孔子父叔梁紇所治邑者古謂大夫守邑者以邑冠之呼為某人孔子父鄭邑大夫左傳稱鄭人紇故此謂孔子為鄭人之子也左傳成二年云新築人仲叔于奚杜注云于奚守新築大夫即此類也

子曰射不主皮注馬曰射有五善焉一曰和志體和二

曰和容有容儀三曰主皮能中質四曰和頌合雅頌五

曰興武與舞同天子三侯以熊虎豹皮為之言射者不但以中皮為善亦兼取和容也為力不同科古之道也注馬曰為力力役之事亦有上中下設三科焉故曰不

同科音義

同科丁仲反下

疏

正義曰此章明古禮也射不

侯而棲熊虎豹之皮於中而射之射有五善焉不但以中皮為善亦兼取禮樂容節也周衰禮廢射者無復禮容但以主皮為善故孔子抑之云古之射者不主皮也為力不同科者言古者為力役之事亦有上中下設三科焉周衰政失力役之事貧富兼并强弱無別而同為一科故孔子非之云古之為力役不如今同科也古之道也者結上二事皆前古所行之道也注馬曰至和容也○正義曰云射有五善焉者言射禮有五種之善下

所引是也云一日和至五日興舞皆周禮鄉大夫職文也云志體和至興舞同皆馬融解義語案彼云退而以鄉射之禮五物詢衆庶一曰和二曰容三曰主皮四曰和容五曰興舞注云以用也行鄉射之禮而以五物詢於衆民鄭司農云詢謀也問於衆庶寧復有賢能者謂閭門之內行也容謂容貌也主皮謂善射射所以觀士也故書舞為無杜子春讀和容為和頌謂能為樂也無讀為舞謂能為六舞玄謂和載六德容包六行也庶民無射禮因田獵分禽則有主皮者主皮者張皮射之無侯也主皮和容興舞則六藝之射與禮與樂是也今此注二曰和容衍和字五曰興武武當為舞聲之誤也云天子三侯以熊虎豹皮為之者周禮天官司裘職云王大射則共虎侯熊侯豹侯設其鵠諸侯則共熊侯豹侯卿大夫則共麋侯皆設其鵠注云大射者為祭祀射王將有郊廟之事以射擇諸侯及羣臣與邦國所貢之士可以與祭者射者可以觀德行其容體比於禮其節

比於樂而中多者得與於祭諸侯謂三公及王子弟封於畿內者卿大夫亦皆有采地焉其將祀其先祖亦與羣臣射以擇之凡大射各於其射宮侯者其所射也以虎熊豹麋之皮飾其側又方制之以為辜謂之鵠著於侯中所謂皮侯王之射虎侯王所自射也熊侯諸侯所射豹侯卿大夫以下所射諸侯之大射熊侯諸侯所自射豹侯羣臣所射卿大夫之射麋侯君臣共射焉凡此侯道虎九十弓熊七十弓豹麋五十弓列國之諸侯大射大侯亦九十參七十千五十遠尊得伸可同耳所射正謂之侯者天子中之則能服諸侯諸侯以下中之則得為諸侯鄭司農云鵠鵠毛也方十尺曰侯四尺曰鵠二尺曰正四寸曰質玄謂侯中之大小取數於侯道鄉射禮曰弓二寸以為侯中則九十弓者侯中廣丈八尺七十弓者侯中廣丈四尺五十弓者侯中廣一丈尊卑異等此數明矣考工記曰梓人為侯廣與崇方參分其廣而鵠居一焉然則侯中丈八尺者鵠方六尺侯

中大四尺者鵠方四尺六寸大半寸侯中一丈者鵠方三尺三寸少半寸謂之鵠者取名於鵠鵠鵠鵠小鳥而難中是以中之為鵠亦取鵠之言較較者直也射所以直己志用虎熊豹麋之皮示服猛討迷惑者射者大禮故取義衆也士不大射士無臣祭無所擇也

子貢欲去告朔之餼羊注鄭曰牲生曰餼禮人君每月

告朔於廟有祭謂之朝享魯自文公始不視朔子貢見

其禮廢故欲去其羊子曰賜也爾愛其羊我愛其禮注

包曰羊存猶以識其禮羊亡禮遂廢音義

去起呂反注同告古爲反

餼許氣反牲生曰餼疏正義曰此章言孔子不欲廢禮朝直遙反又張遙反也子貢欲去告朔之餼羊者牲

生曰餼禮人君每月告朔於廟因有祭謂之朝享魯自
文公怠於政禮始不視朔廢朝享之祭有司仍供備其
羊子貢見其禮廢故欲并去其羊也子曰賜也爾愛其
羊我愛其禮者此孔子不許子貢之欲去羊故呼其名
而謂之曰賜也爾以為既廢其禮虛費其羊故欲去之
是愛其羊也我以為羊存猶以識其禮羊亡禮遂廢所
以不去其羊欲使後世見此告朔之羊知有告朔之禮
庶或復行之是愛其禮也注鄭曰至視朔○正義曰云
牲生曰餼者僖三十三年左傳曰餼牽竭矣餼與牽相
對牽是牲可牽行則餼是已殺殺又非熟故解者以為
腥曰餼謂生肉未煮者也其實餼亦是生哀二十四年
左傳云晉師乃還餼臧石牛是以生牛賜之也此及聘
禮注皆云牲生曰餼由不與牽相對故為生也云禮每
月告朔於廟有祭謂之朝享者案周禮太史頒告朔于
邦國鄭玄云天子頒朔於諸侯諸侯藏之祖廟至朔朝
於廟告而受行之此云子貢欲去告朔之餼羊是用生

羊告於廟謂之告朔人君即以此日聽視此朔之政謂之視朔文十六年公四不視朔僖五年傳曰公既視朔是也視朔者聽治此月之政亦謂之聽朔玉藻云天子聽朔於南門之外是也其日又以禮祭於宗廟謂之朝廟周禮謂之朝享司尊彝云追享朝享是也其歲首為之則謂之朝正襄二十九年正月公在楚傳曰釋不朝正于廟是也告朔視朔聽朔朝廟享廟朝正二禮各有三名同日而為之也必於月朔為此告朔聽朔之禮者杜預春秋釋例曰人君者設官分職以為民極遠細事以全委任之責縱諸下以盡知力之用總成敗以效能否執八柄以明誅賞故自非機事皆委任焉誠信足以相感事實盡而不擁故受位居職者思効忠善日夜自進而無所顧忌也天下之細事無數一日二日萬端人君之明有所不照人君之力有所不堪則不得不借問近習有時而用之如此則六鄉六遂之長雖躬履此事躬造此官當皆移聽於內官回心於左右政之執亂常

必由此聖人知其不可故簡其節敬其事因月朔朝廟遷坐正位會羣吏而聽大政考其所行而決其煩疑非徒議將然也乃所以考已然又惡其密聽之亂公也故顯聚以斷之是以上下交泰官人以理萬民以察天下以治也每月之朔必朝於廟因聽政事敬而禮成故告以特羊然則朝廟朝正告朔視朔皆同日之事所從言異耳是言聽朔朝廟之義也玉藻說天子朝廟之禮云聽朔於南門之外諸侯皮弁聽朔於太廟鄭玄以為明堂在國之陽南門之外謂明堂也諸侯告朔以特羊則天子以特牛與天子用特牛告其帝及其神配以文王武王諸侯用特羊告太祖而已杜預以明堂與祖廟為一但明堂是祭天之處天子告朔雖杜之義亦應告人帝朝享即月祭是也祭法云王立七廟曰考廟王考廟皇考廟顯考廟祖考廟皆月祭之二祧享嘗乃止諸侯立五廟曰考廟王考廟皇考廟皆月祭之顯考廟祖考廟享嘗乃止然則天子告朔於明堂朝享於五廟諸

侯告朔於太廟朝享自皇考以下三廟耳皆先告朔後朝廟朝廟小於告朔文公廢其大而行其小故春秋文公六年經云閏月不告朔猶朝於廟公羊傳曰猶者可止之辭也天子玄冕以視朔皮弁以日視朝諸侯皮弁以聽朔朝服以日視朝其閏月則聽朔於明堂闔門左扉立於其中聽政於路寢門終月故於文王在門為閏云魯自文公始不視朔者即文六年閏月不告朔是也

子曰事君盡禮人以爲諂也注孔曰時事君者多無禮

故以有禮者為諂音義

盡津忍反疏正義曰此章疾時諂勅檢反臣事君多無禮也

言若有人事君盡其臣禮謂將順其美及善則稱君之類而無禮之人反以為諂佞也

定公問君使臣臣事君如之何注孔曰定公魯君諡時

臣失禮定公患之故問之孔子對曰君使臣以禮臣事

君以忠疏

正義曰此章明君臣之禮也定公問君使臣

不能使定公患之故問於孔子曰君之使臣及臣之事君當如之何也孔子對曰君使臣以禮臣事君以忠者言禮可以安國家定社稷止由君不用禮則臣不竭忠故對曰君之使臣以禮則臣必事君以忠也注定公魯君諡○正義曰云定公魯君諡者魯世家云定公名宋襄公之子昭公之弟以敬王十一年即位諡法安民大慮曰

定

子曰關雎樂而不淫哀而不傷注孔曰樂不至淫哀不

至傷言其和也音義

雎七餘反哀如字疏正義曰此章毛詩箋改哀為衷言正義曰此章

也闕睢者詩國風周南首篇名興后妃之德也詩序云樂得淑女以配君子憂在進賢不淫其色是樂而不淫也哀窈窕思賢才而無傷善之心焉是哀而不傷也樂不至淫哀不至傷言其正樂之和也

哀公問社於宰我宰我對曰夏后氏以松殷人以柏周

人以栗曰使民戰栗注孔曰凡建邦立社各以其土所

宜之木宰我不本其意妄為之說因周用栗便云使民

戰栗子聞之曰成事不說注包曰事已成不可復解說

遂事不諫注包曰事已遂不可復諫止既往不咎注包

曰事已往不可復追咎孔子非宰我故歷言此三者欲

使慎其後音義

社如字鄭本作主云主田主謂
疏曰此

章明立社所用木也哀公問社於宰我者哀公魯君也
社五土之神也凡建邦立社各以其土所宜木哀公未
知其禮故問於弟子宰我也宰我對曰夏后氏以松殷
人以柏周人以栗曰使民戰栗者三代立社各以其土
所宜木故宰我舉之以對哀公也但宰我不本其土宜
之意因周用栗便妄為之說曰周人以栗者欲使其民
戰栗故也子聞之曰成事不說遂事不諫既往不咎者
孔子聞宰我對哀公使民戰栗知其虛妄無如之何故
曰事已成不可復解說也事已遂不可復諫止也事已
往不可復追咎也歷言此三者以非之欲使慎其後也
注孔曰至之木○正義曰云凡建邦立社各以其土所
宜之木者以社者五土之總神故凡建邦立國必立社
也夏都安邑宜松殷都亳宜栢周都豐鎬宜栗是各以
其土所宜木也謂用其木以為社主張包周本以為哀

公問主於宰我先儒或以為宗廟主者杜元凱
何休用之以解春秋亦為宗廟主今所不取

子曰管仲之器小哉注言其器量小也或曰管仲儉乎

注包曰或人見孔子小之以為謂之大儉曰管氏有三

歸官事不攝焉得儉注包曰三歸娶三姓女婦人謂嫁

曰歸攝猶兼也禮國君事大官各有人大夫兼并今管

仲家臣備職非為儉然則管仲知禮乎注包曰或人以

儉問故答以安得儉或人聞不儉便謂為得禮曰邦君

樹塞門管氏亦樹塞門邦君為兩君之好有反坫管氏

亦有反玷注鄭曰反玷反爵之玷在兩楹之間人君別

內外於門樹屏以蔽之若與鄰國為好會其獻酢之禮

更酌酌畢則各反爵於玷上今管仲皆僭為之如是是

不知禮管氏而知禮孰不知禮音義

量音亮大儉音泰一音他賀反焉於

虔反為兩于偽反又如字好呼報反玷丁念疏正義曰

反別彼列反酢才洛反一本作酬更音庫此章言

管仲僭禮也子曰管仲之器小哉者管仲齊大夫管夷

吾也孔子言其器量小也或曰管仲儉乎者或人見孔

子言管仲器小以為謂其大儉故問曰管仲儉乎曰管

氏有三歸官事不攝焉得儉者孔子答或人以管仲不

儉之事也婦人謂嫁曰歸攝猶兼也焉猶安也禮大夫

雖有妾媵嫡妻唯娶一姓今管仲娶三姓之女故曰有

三歸禮國君事大官各有人大夫雖得有家臣不得每
事立官當使一官兼攝餘事今管仲家臣備職奢豪若
此安得為儉也然則管仲知禮乎者或人聞孔子言管
仲不儉便謂為得禮故又問曰然則管仲是知禮之人
乎曰邦君樹塞門管氏亦樹塞門邦君為兩君之好有
反坫管氏亦有反坫者此孔子又為或人說管仲不知
禮之事也邦君諸侯也屏謂之樹人君別內外於門樹
屏以蔽塞之大夫當以簾蔽其位耳今管仲亦如人君
樹屏以塞門也反坫反爵之坫在兩楹之間人君與鄰
國為好會其獻酢之禮更酌酌畢則各反爵於坫上大
夫則無之今管仲亦有反爵之坫僭濫如此是不知禮
也管氏而知禮孰不知禮者孔子舉其僭禮於上而以
此言非之孰誰也言若謂管氏而為知禮更誰為不知
禮言唯管氏不知禮也注婦人謂嫁曰歸○正義曰云
婦人謂嫁曰歸者隱二年公羊傳文何休曰婦人生以
父母為家嫁以夫為家故謂嫁曰歸明有三歸之道也

注鄭曰至坫上○正義曰云反坫反爵之坫在兩楹之間者以鄉飲酒是鄉大夫之禮尊於房戶間燕禮是燕已之臣子故尊於東楹之西若兩君相敵則尊於兩楹間故其坫在兩楹間也云人君別內外於門樹屏以蔽之者釋宮云屏謂之樹郭璞曰小牆當門中郊特牲云臺門而旅樹鄭玄云此皆諸侯之禮也旅道也屏謂之樹樹所以蔽行道管氏樹塞門塞猶蔽也禮天子外屏諸侯內屏大夫以簾士以帷是也云若與鄰國為好會其獻酢之禮更酌酌畢則各反爵於坫上者熊氏云主君獻賓賓筵前受爵飲畢反此虛爵於坫上於西階上拜主人於阼階上答拜賓於坫取爵洗爵酌以酢主人主人受爵飲畢反此虛爵於坫上主人阼階上拜賓答拜是賓主飲畢反爵於坫上也而云酌畢各反爵於坫上者文不具耳其實當飲畢

子語魯大師樂曰樂其可知也始作翕如也注大師樂

官名五音始奏翕如盛從之純如也注從讀曰縱言五音既發放縱盡其音聲純純和諧也皦如也注言其音節明也繹如也以成注縱之以純如皦如繹如言樂始作翕如而成於三音義

語魚據反大音泰注同翕許及反何晏云盛也鄭云變動貌從

何讀為縱子用反放縱也鄭云八音皆作皦古了反其音節奏分明也鄭云清別之貌繹音亦鄭云志意條達之疏正義曰此章明樂子語魯大師樂者大師樂官名貌猶周禮之大司樂也於時魯國禮樂崩壞故孔子以正樂之法語之使知也曰樂其可知也者言作正樂之法可得而知也謂如下文始作翕如也者言正樂始作則五音翕然盛也翕盛貌如皆語辭從之純如也者從讀曰縱謂放縱也純和也言五音既發放縱盡其音

聲純純和諧也。皦如也者，皦明也。言其音節分明也。繹如也者，言其音絡繹然相續不絕也。以成者言樂始作。繹如又縱之以純如。皦如繹如則正樂以之而成也。

儀封人請見。注鄭曰：儀蓋衛邑，封人官名。曰：君子之至於斯也，吾未嘗不得見也。從者見之。注包曰：從者弟子。隨孔子行者，通使得見。出曰：二三子何患於喪乎？天下之無道也久矣。注孔曰：語諸弟子言何患於夫子聖德之將喪亡邪？天下之無道已久矣。極哀必盛。天將以夫子爲木鐸。注孔曰：木鐸施政教時所振也。言天將命孔

子制作法度以號令於天下音義

見賢遍反從才用反
喪息浪反注同語魚

據反鐸直畧反木鐸金鈴

疏正義曰此章明夫子之德

天將命之使其定禮樂也

木舌施政教之所振也
儀封人請見者衛國儀邑典封疆之人請告於孔子從
者欲見孔子也曰君子之至於斯也吾未嘗不得見也
者此所請辭也嘗會也言往者有德之君子至於我斯
地也吾嘗得見之未曾有不得見者也從者見之者從
者謂弟子隨孔子行者既見其請故為之紹介通使得
見也出曰二三子何患於喪乎者儀封人既請見夫子
出門乃語諸弟子曰二三子何須憂患於夫子聖德之
將喪亡乎天下之無道也久矣者此封人又說孔子聖
德不喪之由也言事不常一盛必有衰衰極必盛今天
下之衰亂無道亦已久矣言極弱興衰屬在夫子天將
以夫子為木鐸者木鐸金鈴木舌施政教時所振也言
天將命孔子制作法度以號令於天下如木鐸以振文

教也注鄭曰儀蓋至官名○正義曰云儀蓋衛邑者以左傳衛侯入於夷儀疑與此是一故云蓋衛邑也云封人官名者周禮封人掌為畿封而樹之鄭玄云畿上有封若今時界也天子封人職典封疆則知諸侯封人亦然也左傳言潁谷封人祭仲足為祭封人宋高哀為蕭封人此云儀封人皆以地名封人蓋職典封疆居在邊邑潁谷儀祭皆是國之邊邑也注通使得見○正義曰云通使得見者見謂為之紹介使之見也若左傳云乃見縛設諸馬齊豹見宗魯於公孟亦然注孔曰至振也○正義曰云木鐸施政教時所振也者禮有金鐸木鐸鐸是鈴也其體以金為之明舌有金木之異知木鐸是木舌也周禮教鼓人以金鐸通鼓大司馬教振旅兩司馬執鐸明堂位云振木鐸於朝是武事振金鐸文事振木鐸此云木鐸施政教時所振者所以振文教是也

子謂韶盡美矣又盡善也注孔曰韶舜樂名謂以聖德

受禪故盡善謂武盡美矣未盡善也注孔曰武武王樂

也以征伐取天下故未盡善音義韶常遙反舜樂名盡津忍反疏正

曰此章論韶武之樂子謂韶盡美矣又盡善也者韶舜樂名韶紹也德能紹堯故樂名韶言韶樂其聲及舞極盡其美揖讓受禪其聖德又盡善也謂武盡美矣未盡善也者武周武王樂以武得民心故名樂曰武言武樂音曲及舞容則極盡美矣然以征伐取天下不若揖讓而得故其德未盡善也注孔曰至盡善○正義曰云韶舜樂名者樂記云紹繼也注云韶紹也言舜之道德繼紹於堯也元命包曰舜之時民樂紹堯業虞書益稷云簫韶九成鳳凰來儀是韶為舜樂名也云謂以聖德受禪故盡善者書序云昔在帝堯聰明文思光宅天下將遜于位讓于虞舜孔安國云老使攝遂禪之禪即讓也是以聖德受禪也注孔曰至未盡善○正義曰云武武

王樂也者禮器云樂也者樂其所自成注云作樂者緣民所樂於己之功然則以武王用武除暴為天下所樂故謂其樂為武樂武樂為一大事故歷代皆稱大也云以征伐取天下故未盡善者以臣伐君雖曰應天順人不若揖讓而受故未盡善也

子曰居上不寬為禮不敬臨喪不哀吾何以觀之哉疏

正義曰此章總言禮意居上位者寬則得眾不寬則失於苛刻凡為禮事在於莊敬不敬則失於傲惰親臨死喪當致其哀不哀則失於和易凡此三失皆非禮意人或若此不足可觀故曰吾何以觀之哉

論語注疏卷三

論語注疏卷三考證

三家者章注疏仲孫是慶父之後叔孫是叔牙之後季孫是季友之後其後子孫皆以其仲叔季為氏○臣

宗楷按纂疏引胡氏云三家皆魯威公庶子初以仲

叔季為氏後加孫字公子之子稱公孫也仲改為孟者庶子自為長少不敢與嫡子莊公為伯仲叔季以公孫不敢祖諸侯也故自以庶長為孟至杜預作公子譜則云以仲慶父之故遂改為孟與正義不合

禘自既灌而往者章注禘祫之禮爲序昭穆故毀廟之主及羣廟之主皆合食於太祖○臣宗楷按馬融王肅皆云禘大祫小鄭注二禮則云祫大禘小賈逵劉歆則云一祭二名禮無差降考趙伯循引曾子問春秋傳以明祫之爲合如諸儒之說禘則直祭祖所自出而以其祖配但設兩位而不及羣廟之主集註遵之然孔穎達正義曰禘所以異於祫者毀廟之主陳於太祖廟與祫同未毀廟之主則各就其廟而祭是

禘亦陳有毀廟之主不止設兩位矣故後漢張純曰
禘者諦也審諦昭穆之次使不亂也

器小章有反坫注反爵之坫在兩楹之間○臣宗楷按
郊特牲云臺門而旅樹反坫汲冢周書云乃立五宮
咸有四阿反坫注云外向室也黃震亦云反者向外
之名坫者別設大門屏之名然則為兩君之好有反
坫者蓋欲容儀衛之衆以為此向外之室耳據郊特
牲以反坫與臺門相聯汲冢書以反坫與四阿相聯

本文以反坫與樹塞門相聯恐均是居室僭侈之事

論語注疏卷三考證